

Pɔl saba cir kaplāŋ Korntifa ye

Syaha fla

¹ Ndoo Pɔl kē ma suhu wo Yesu kāndeyārwe Sohōtān ne, too saba nwo yrūhū nɔ wāā. Ndoo Pɔl kē, le tāy Yāhā ye ke n ta yee, n ba nii Yesu Crise tēnlēhē.

² Wo u saba yrūhū nɔ wāā Yesu kāndeyārfa yawāhāfa kē Kornti wo. Yāhā pe yee, ma pe ta ke wām, pe n wāā le Yesu Crise kāmāy na. Wo u yrūhū nɔ wāā mpāy bya kē pe ma teebēhē bye wo, ma -sē wo Yīnfua Yesu Crise miingbāŋ gbōho. Woo kē pe Yīnfua tesē wo bye Yīnfua.

³ Wo Tuhufua Yāhā ma suhu wo Yīnfua Yesu Crise ne, ke ke laantār wīl pye ye kē, tesē pe pe yrīŋ wāā ye kē.

Korntifa Yāhā laantār wūhū yāā Yesu Crise kāmāy na

⁴ Yāhā laantār wīl lii pye ye kē Yesu Crise kāmāy na, yalebye n syaha wāā ke kē loo wīl na.

⁵ Ye cā tee wāā le Yesu Crise ne, Yāhā ta ye n kayūhū yāā ye kānkai- bye wo. Koo kayūhū kē ye le Yāhā kapāyīl cā, ye le war.

⁶ U Yāhā Yīndefua Crise kapāyīl nnen gbāā ye laam wo,

⁷ ye n sya ke Yāhā kayūhū yāā. Koo ke ye ta ye n waha wo Yīnfua Yesu Crise wādurbaŋ sēŋ.

⁸ Woo kē u ga ye ta ye n yii plāhā yaha, u ma ba dur ba, waa ma n ba yāã ye plaha laa ne ye.

⁹ Yāhā ma yē ter lii ne, ke le pye, koo gii ke ye yee, ye seefar le ke Dya Yesu Crise ne, woo wii u ma wo Yīnfua.

Pe Yesu kāndeyārfa tee ma creᅇcreᅇ Kornti wo

¹⁰ Wo nna, n ga le nar waha ye ye wo Yīnfua Yesu Crise myaha ne: -Ye wāã le, ye ma syi ye nii creᅇcreᅇ ye! -Ye nii yīmbui nen na, -tee nii laantee nen ne!

¹¹ Wo nna, ye sē yāã, cɔɔ nwo pe n yee Klowee, u kahafa mpāy ra yar ma yee, wāhā ma ye nsoho wo.

¹² Lii le ma le na, ye kaplāᅇ ma ke ya wuhu na: Nwo ga yee woo ma Pɔl kur ye, waa ter ga yee woo ma Apolosu kur ye, waa ga yee woo ma Pyar kur ye, waa ga yee woo ma u Yāhā Yīndefua Crise kur ye.

¹³ Tee le cā laha ma yee, u Crise sē la cɛr flɛ flɛ ye, ye tee nii creᅇcreᅇ. -Ye yāᅇ, ndoo Pɔl sē kē tē ku trā na ye wī na ye. Ye sē maha tāã yi loho wo ndoo myaha na ye.

¹⁴ N syaha wāã Yāhā kē tē sē ye tāã yi loho wo ye, ma yi kāã Kirpusu na, Kayusu ne.

¹⁵ Loo na, waa saha yee ndoo kē n ye tāã yi loho wo ta myaha na ye.

¹⁶ Cīnde, n maha Tefanase kahafa tāã yi loho wo. N sē -sē le sya n maha waa tāã yi yāã loho wo nantāᅇ ye.

¹⁷ U Crise sē ra lehe wāã nawee- wātāã myaha na ye. U ra lehe wāã, n ba naa le kapāyī wūhū yar nawee- na. U sē ra lehe wāã, n ba naa le kapāyī wūhū pāã mii pe nawee- kacān wūhū

pãã mii syi dyaŋ ye. U Crise wãku wĩ trã na, n ma le pãã nawee- kacãn yor ne, le saa pii sa ye.

Yesu Crise ma Yãhã laantor ne, tesẽ ke fãngangbãŋ ne

¹⁸ Ye sã yãã, mpãy pe wĩ ga ba klaha-, ma'a Yãhã Yĩndefua Crise trã wãku wĩ pãã pe ye, pe ga yee, a yĩŋ wee le na ye. Ma -sẽ yee wii poo na too sya yaha u Crise kãmay na, wo cã Yãhã fãngangbãŋ kã u Crise trã wãku wĩ ne.

¹⁹ Loo ne le yrũhũ yaha Yãhã sabangbãŋ wo ma yee, Yãhã yee:

«Mpãy pe ma laantorfa,

n ga pe laantor wũhũ pye klaha- pe kã.

Mpãy pe ma kaicãfa, n ga pe kacãn wũhũ sye.»

²⁰ Loo na, ma'a nii laantorfa, laa na kaicãfa, laa na kaplãntãhã pããfua driyẽ wĩ na, le wãyiĩ -sẽ ma na ma ye? Yãhã ge le yar ma yee yĩŋ wee driyẽfa kacãn na ye.

²¹ Ye sã yãã, driyẽfa laantor pe ta pe sã waha Yãhã laantor war ye. Loo ne, mpãy pe Yesu ta pe Yater, Yãhã yee ke ga poo sya yaha le Yesu kapãyiĩ kãmay na, lii le n pãã driyẽfa ye, pe n yee yĩŋ wee le na ye.

²² Yiiffee- n ke laanwo wũhũ n pye pe n yãã yĩnde ne. Jrekefa n ke pe kacãn yãã driyẽ wũhũ wĩ na.

²³ Wii poo na, wo u Crise trã wãku wĩ pãã nawee- ye. Loo nde ncafũhũ yigi pe Yiiffee- kã; mpãy pe wee Yiiffee- ye, poo n yee yĩŋ wee le na ye.

²⁴ Yesu kändeyārfa bye, mpây pe ma Yiifee-, tesê mpây ne pe wee Yiifee- ye, poo ye u Crise ma Yâhâ fāngangbāŋ, ma maha ma ke laantor.

²⁵ Yâhâ wūhū nkāy nawee- n yee yīŋ wee ke na ye, ke ter gboho nawee- laantor wūhū na. Tesê, Yâhâ wūhū nkāy nawee- n yee fānga wee ke na ye, ke ter gboho nawee- fānga na.

²⁶ Wo nna, tee wee ngaa driyēfa yīnde na ye, Yâhâ n -sê ye yāŋ yi, -ye loo yāŋ! Ye laam wo, kaicāfa sê nihi ye, fāngafa sê nihi ye, nangbām sê nihi ye.

²⁷ Mpây pe wee kaicāfa driyēfa yīnde na ye, Yâhâ poo yāŋ yi, ma fyar yaha mpây na pe ma kaicāfa driyēfa yīnde na. Mpây pe wee fāngafa driyēfa yīnde na ye, Yâhâ poo yāŋ yi, ma fyar yaha mpây na pe ma fāngafa driyēfa yīnde na.

²⁸ Mpây pe ma naflam, driyēfa sê pe yāŋ nawee draha wo ye, ma suhu mpây ne pe wee ngaa driyēfa yīnde na ye, Yâhâ poo yāŋ yi, ma -sê pe driyēfa fānga wī kua,

²⁹ nawee waa ma n waha u ya sey Yâhâ yaha ye ye.

³⁰ Yâhâ -sê ye ta ye n seefar le Yesu Crise ne, woo kê u laantor le nawee laam wo. Woo kāmāy na wo sron Yâhâ yīnde na, wo nii Yâhâ wām, wo maha wāsyayaha yāã.

³¹ Loo ne, le yrūhū yaha Yâhâ sabangbāŋ wo ma yee:

«Waa sê yai u naa u ya sey ye,
u yai u naa Yīnfua Yâhâ koo sey.»

Yesu Crise trã wãku wĩ loo le ma yĩŋ

¹ Wo nna, tẽ ba ka ye fla na, maa le Yãhã kapãyĩ wĩ pãã ye ye, ta yẽ kaplãŋ pye yaayaa, ta kacãyor sã maha ba ter ye kacãn fla yaha ye.

² Ye sã yãã, tẽ pye ye nsoho wo, n ba yee n saa laa pãã ye ye mii Yesu Crise wĩ ya sã ne, tesẽ u trã wãku wĩ ne ye.

³ Tẽ pye ye fla na, fãnga sã pye ra na ye, n naa n fya ma sya naa n sege.

⁴ Kaplãŋ nkãy tẽ naa n pãã ke pye gbegbe, ke sã pye kacãyor kaplãntãhã ye. Yãhã Yrã Fãnga pye ra kaplãŋ na, ma ta nawee- n naa ke kaplãŋ sya.

⁵ Loo na, driyẽfa laantor ter sã ne te ye ta ye n Yesu ta ye Yater ye, Yãhã Fãnga koo kẽ.

Yãhã laantor

⁶ Mpãy pe yĩntar too Yesu Crise kãnde wo, wo laantor raa wĩ pãã pe ye. Driyẽfa laantor ter sã ne ye, driyẽ yĩŋfa laantor ter sã maha ne ye, poo mpãy pe fãnga ga ba pye klaha- pe ye.

⁷ Yãhã laantor wĩ ne too n pãã, tii driyẽfa sã te war ye, te wũhũ pe na. Driyẽ sã bii tãhã wa ye, Yãhã bii too laantor cãã gbihi ta wa wo kẽ, wo nayõr wãyãã wĩ na.

⁸ Too laantor wee driyẽ yĩŋfa ye ye. Mii loo sã ne ye, pe saa ne pye pe Yesu Crise kuey mar boo trã na ye, woo wii u ma nayõr ter bye Yĩŋfua.

⁹ Loo ne le yrũhũ yaha Yãhã sabangbãŋ wo ma yee:

«Kai- nkãy nawee waa sã ke yãã yãã yĩnde ne ye,
waa sã maha ke luhu yãã ye,
ke sã pye yãã waa laam wo ye,

Yāhā koo cāā gbihi ta
mpāy kē ke ntāŋ dye pe tāy.»

¹⁰ Koo kai- ngī Yāhā ke yar wo na ke Yrā kāmāy na. Ye sē yāā, Yāhā Yrā Fānga kai- bye cā, Yāhā wūhū nkāy ge ne ke sē n yi gbaa na ye.

¹¹ Ye cā, waa saha nawee laam wī cā ye. Nawee yrā lii le ma u laam wo, loo ne le u laam wī cā. Ke syi, waa saha Yāhā laam wī cā mii Yāhā Yrā sē ne ye.

¹² Wii poo -sē na, driyē nge yrā ter sē ne le ma wo laam wo ye. Yāhā Yrā ter loo ne too yāā; Yāhā le wāā wo kē, ma yee wo waha ke kayūhū cā, kayūhū nkāy Yāhā ke wāā wo kē.

¹³ Wo koo kayūhū ngī wī pāā nawee- ye. Wo sē ke pāā driyēfa kacāyor kaplāntāhā ne ye; Yāhā Yrā kaplāŋ nkāy le wo yē wo, koo too n pāā. Yāhā Yrā kaplāŋ kē ke ne ke Yāhā Yrā wūhū pāā.

¹⁴ Nawee wii Yāhā Yrā wee u laam wo ye, u saha Yāhā Yrā wūhū yāā ye; woo ye, yīŋ wee ke na ye. U saha ke war ye, ke n war Yāhā Yrā kāmāy ya na, koo kē.

¹⁵ Nawee wii u Yāhā Yrā yāā, lii le sron lii ne le sē sron ye, u koo war. Woo na, nawee waa ter saha u wūhū war ye, nawee wii u sē Yāhā Yrā yāā ye.

¹⁶ Loo ne le yrūhū yaha Yāhā sabangbāŋ wo ma yee:

«Yoo Yāhā laam wūhū cā,
ma ga waha naa ke klaha kai- ne?»

Wii poo -sē na, wo ma Yāhā Yīndefua Crise laam ter ne.

3

Yāhā tēntē- wī

¹ Wo nna, n sē ba naa kai- pāā ye ye, mii mpāy dyaŋ Yāhā Yrā laantor ma pe ye ye. Ye naa ye laam wūhū ya pye, ye pye mii pēyār dyaŋ le Yāhā Yīndefua Crise kānde wo.

² Kai- nkāy tē naa n pāā ye ye, ke pye mii yīm dyaŋ tē naa n wāā ye kē; ke ma ne pye mii wāε digi dyaŋ, ye saa ne waha yia ye. Yagaa ge na, ye saha yia ye, ye tee mii, ye laam wūhū ya tee n pye nantāŋ.

³ Ye sē yāā, tee laanyar pye yii na, wāhā ke maha ma ye nsoho wo, koo ngī le yar ma yee, ye ye laam wūhū ya pye, ye ma mii driyēfa dyaŋ.

⁴ Ye laam wo, nwo ga yee woo ma Pɔl kur ye, waa ter ga yee woo ma Apolosu kur ye. Loo nde le yar ma yee ye ma mii driyēfa dyaŋ.

⁵ Apolosu wī ma lii ne? Ndoo Pɔl, ta wī ma lii ne, ye n nii n wāā wo wī na? Yāhā tēntē- ya me wo ne, ke wo tēŋ la wo kē. Wo kāmāy na ye Yesu ta ye Yater.

⁶ Le ma mii ndoo Pɔl ngaa sī wāsī ya, Apolosu n loho ya woo ke na, Yāhā koo n -sē ke ta ke n yir.

⁷ -Ye yāŋ, u sīfua wee ngaa ye, u lawoofua wee ngaa ye. Yāhā gii ke ke ta ke n yir, koo kē ke ma yīŋ.

⁸ U sīfua ma suhu u lawoofua ne, pe ma wācɛŋ. Pe pe tēn tē mii syi dyaŋ, Yāhā ga ba pe dāān wāā pe kē koo syi, pe ya wuhu na.

⁹ Ye sē yāā, ndoo ma suhu Apolosu ne, wo ma mii tawarfa dyaŋ Yāhā ye. Yii -sē ma mii tar dyaŋ

Yāhā ye. Ye maha ma mii kangbāŋ dyaŋ ke fāā yir Yāhā kē.

¹⁰ Yāhā ndoo ta ra n waha yia, ma ke kangbāŋ nakūy kā mii kaha fāāfuayō dyaŋ. Yāhā ke laantār wīī nde pye ra kē. Waa ter n -sē ba fāā taha koo kaha nge nakūy na. Mpāy bye pe -sē ga ba fāā naa n taha ke na, pe pe ya yigi pe wāfāā ter ne.

¹¹ Koo kangbāŋ nakūy lii le ta wa, loo ne Yesu Crise wātaŋ ne ye Yateɾ. Yīŋ wee kangbāŋ gaa ter nakūy na Yāhā ye ye.

¹² Nawee- mpāy fāā n taha ke kangbāŋ nakūy na sān wān ne; mpāy, wargbe wān ne; mpāy, ntēmbar raa ter ne kacān wee te dir na ye. Mpāy ter maha ma, pe fāā n taha katyigi ne; mpāy, nyēfar ne; mpāy, nyōr ne.

¹³ Yesu Crise kasāhā per maa nɔ, naa ga ba ta le n cā mpāy poo wān yō, naa saha te pye klaha-ye, wān tii pe fāā naa n taha te ne. Mpāy, naa ga waha pe wān pye klaha-, le bya ga ba cā.

¹⁴ Naa ma yee ke sē wii tēn klaha- kāā koo kangbāŋ nakūy na ye, ufua ga dāān yāā.

¹⁵ Naa ma -sē wii tēn klaha- kāā, koo kangbāŋ nge nakūy na, ufua saa dāān yāā ye. U ga nii mii nawee wii dyaŋ, naa u wān bye suhu, woo ya n yi le wo.

¹⁶ Ye sē cā la ma yee ye kadye ma Yāhā niisaha, Yāhā Yrā Fāŋga ma ye nanem bye laam wo?

¹⁷ Nawee wii ma koo Yāhā niisaha pye klaha-, Yāhā ga woofua bya pye klaha-. Ye sē yāā, Yāhā niisaha ma Yāhā wāŋ. Ye bye -sē ma Yāhā niisaha.

¹⁸ N ga laa pāā ye ye, waa ma syi u u ya kar

yaha le ne ye, loo ne nde: Ye laam wo, waa ma yee woo ma driyěfa laantor ter ne, u too miy yaha. -Tuu Yāhā laantor ter gbe, too tii yīŋ wee te na driyěfa ye ye. Loo na, u ga nii cīnde laantorfua Yāhā ye.

¹⁹ Ye sē yāā, yīŋ wee driyěfa laantor ter na Yāhā ye ye. Le ma gε ma le yrūhū yaha Yāhā sabangbāŋ wo ma yee: «Driyě laantorfa, Yāhā pe yigi pe ya koho kacān namihi ne.»

²⁰ Le maha ma le yrūhū yaha ma yee: «Yāhā nawee laantor ter wūhū cā. Ke cā too nde saha laa yō ye.»

²¹ Loo nde na, ye ma syi ye naa naweete myaha gboho ye! Ye sē yāā, kai- bye ma ye wān:

²² Ndoo Pōl woo, Apolosu woo, Pyar woo, driyě wān woo, yrāŋ wīl woo, gbā wīl woo, yagaa wūhū woo, sukūhū gaa wūhū woo, too nde bye ma ye wān.

²³ Ye -sē ma u Yāhā Yīndefua Crise wām, u Crise -sē ma Yāhā wūū.

4

Yesu Crise tēntē-

¹ Ye yai ye cā u Yāhā Yīndefua Crise tēntē- me wo ne. Yāhā wūhū nkāy nawee- sē ke cā yāā ye, koo wo n yar nawee- na.

² Wii u -sē ma Yāhā wūhū yarfua nawee- ye, lii le ma u wīl, u yai u sroŋ.

³ Le tāy ye yee ta wīl yō, laa na ye yee ta wīl sē yō ye, le tāy le pye kasāhāfa gε pe ra wīl pāā ke syi dyaŋ, le sē kai kua ra ye ye. Ndoo gε sē laa pāā nii wāpee wīl na ye;

⁴ n sē laa yāã tē tee pye ye. Loo sē -sē ne le ga ta ra n sronj Yāhā ye ye. Wii u ma ra kasāhāfua, woo kē Yīnfua Yesu ne.

⁵ Loo ne, ye ma syi ye cāã naa laa pāã waa wīi na mii le yale sē nɔ wa ye, yaliile Yīnfua Yesu ga ba dur ba. U ga ba wam wūhū gbe yi gbaa na, nawee laam wūhū bya ne. Loo na, nawee nawee woo, u ga ba u miyūhū lay yāã Yāhā ye.

⁶ Wo nna, n wo wīi pāã ye ye, ndoo tesē Apolosu ne, ma yee ye waha ke kai- war. N yee n ga wo wīi pāã ye ye, ye n naa ye troho tāhā mii le ma le yrūhū yaha Yāhā sabangbānj wo mii. Ye ma syi ye naa n yee nwo wāklaha ter puar nwo wāklaha na, le n nii ye n yatanj ta yii na ye.

⁷ Ye sē yāã, yoo nawee- ta pe wee wācɛnj pe ya ne mii Yāhā sē kē ye? Mboo nawee, kayīi lii ma ma ye, mii Yāhā sē kē ke loo wāã ma kē ye? Taa -sē loo yāã, ma tee mii sey mii Yāhā sē kē ke le wāã ma kē ye.

Yatanj gboho ter Korntifa na

⁸ Ye sē yee la, a yii kai- cā yai wa, a ye ngbānj yai wa kacān ne, a wii ma sya yee wo wee ye, ye ga waha yahasee gbe? Ye ma nii yahasee ye cīinde, le yō; ye ga waha wo bya ta wo n nii yahasee ye.

⁹ Ye sē yāã, wii Yesu tēnlɛɛ, le wee la mii Yāhā wii ta nawee- byɛ kur kuɛ ye, mii mpāy dyanj pe yai wāboo ne? Driyē nge wo, pe nabuar, ma suhu pe yāhāyīnj tēnlɛɛ ne, pe yīnde ma wo na ke kai- byɛ wo.

¹⁰ U Yāhā Yīndefua Crise wīi ta pe n nii n yee yīnj wee wo na ye. Yii poo -sē na, ye sē yee la ye ma laantorfa le Crise kānde wo? Fānga wee wii

ye ye, yii poo -sẽ na, ye sê yee la fãnga ma ye ye? Ye sê yee la nawee- ye myaha sey, wii poo -sẽ na, pe sê wo yãŋ nawee draha wo ye?

¹¹ Ma sya ba waa yagaa na, wo n fãy fãã ne, loho fãã ne, faha wãn sê maha yai wo ye ye, pe wo nuhu, niisar wee wo ye ye.

¹² Wo wo yẽ digi yãã wii koho kasyã na. Mpãy pe wo tyehɛ, wo Yãhã nar ke kaa taha pe na. Mpãy pe wo nuhu Yesu Crise wĩ na, wo sê n fya koo wãfãy na ye, ke ma sya pye mii.

¹³ Nawee wii ma wãpee pãã wo wĩ na, wo u yẽ wãã n sya kayĩ ne. Ma sya ba waa yagaa na, wo ma kafar wãŋ syi dyaŋ driyẽfa ye, wo wĩ fũhũ nawee- ye.

¹⁴ N sê koo kaplãŋ ngĩ yrũhũ ye kê ma yee, n ga fyar yaha ye na ye. N yee n ga ye cãã yar ke kai- ne, mii waa dyaŋ u pii ne pe ntãŋ dye u tãy.

¹⁵ Ye sê yãã, mpãy pe ye klaha le Crise kãnde wãyãr ne, pe ma sya nawee- nyerbua tã, tuhufa buar wee ye ye ye. Tee fe dye le Yesu kãnde wo, ndoo kê n cãã ye klaha le Yesu Crise kapãyĩ wĩ ne, koo kê ndoo kê ye tuhufua le Yesu kãnde wo.

¹⁶ N ga ye nar waha nde ne, -ye ra pyer ter gbe!

¹⁷ Loo ne ta n Timuti nɔ wãã ye ye. U ma ta dya le Yĩnfua Yesu kãnde wo, u ntãŋ dye ra tãy, u n sron le Yesu tẽn ne. U ga ba ye gbihi yar ta troho wãtãhã ter ne le Yesu Crise kãnde wo, tesê ta kaklaha ter ne Yesu kãndeyãrfa yawãr teebehe byɛ wo.

¹⁸ Ye laam wo, mpãy ta yi yataŋ ne ma n yee, a ndoo saa ka ye fla na ye.

¹⁹ Yãhã ma sya, n ga ka ye fla na, le saa ma- ye. Mpãy pe yee poo ta yi pe yataŋ ne, n sê n gaha

pe kaplāņ ya luhu ye, n n gaha yāņ pe ma waha n yia, ma pe troho tāhā le Yesu kānde wo fānga ne.

²⁰ Ye sē yāā, Yāhā Yai wīī na, kaplāņ koo sē kē ke ma yīņ ye; ma waha yia, ma naa ma troho tāhā le Yesu kānde wo fānga ne, loo le ma yīņ.

²¹ Lii loo le n tāy ye ye? N ka ye fla na ye wāpēn yīmbui ne laa, n ka ye fla na laantār ne mii waa dyaņ u pii ne pe ntāņ dye u tāy?

5

U kapeepyefua yai u cer yi kāā ye yawāhāfa wo

¹ Pe le pāā, a ye yawāhāfa wo tyatyāhā wīī laa ma, le wāpee! Mpāy ge pe sē cīinde Yāhā cā ye, poo kānde na le syi sē yai le pye ye. Le nde, ye laam wo, waa ma u u tuhufua cōo di.

² Loo naa bye ne, ye yataņ gboho, ma sya ta yi. Ye ma ne pye fyar ye yigi, le n nii ye fāy, ye ne ga u tyatyāhāfua cer yi kāā ye yawāhāfa wo.

³ Ndoo woo na, tē sya dey ye na, ta laam ma ye fla na. Wii tuu kapee nde pye, ndoo woofua sāhā wa wo Yīņfua Yesu kāmāy na, mii n ma ye fla na.

⁴ Ye ma yii wāā Yīņfua Yesu myaha na, ta laam bya ga ba pye ye nsoho wo, Yīņfua Yesu fānga ne.

⁵ Ye ga ba u kapeepyefua cer yi kāā ye yawāhāfa wo, Setane n u fāy u kadye sraha na, u tyatyāhā laampee n sya ba pye klaha-. Loo na, u ga ba sya yaha wo Yīņfua Yesu wādurba per.

⁶ Ye yii ka n sey ke dyaŋ, yĩŋ wee le na ye ye ye. Ye cã ncasur car ya kē, ke ke bur loho bye ta ke n fua n yir busãã.

⁷ Kapee- wāpyeŋ ma mii ncasur wāŋ syi dyaŋ ke le nii nawee laam wo. -Ye ye ncasur yi kãã yii wo, ye nii mii bur loho wāfãŋ dyaŋ ke ma gbegbe, ncasur wee ke laam wo ye. Āwā, ye -sē ma gbegbe koo syi dyaŋ; ye sē yãã, pe u Yãhã Yĩndefua Crise boo mpar draha wo wo kapee-wĩ na. Woo kē wo syayaha gbar.

⁸ -Too naa wo syayaha gbar gbar, wo naa wo troho tãhã Yesu kãnde wo, wo wo napeer miy yaha, wo tyatyãhã ne te ma mii ncasur wāŋ syi dyaŋ! Loo na, wo ga naa wo troho tãhã Yesu kãnde wo cĩnde, wo nii gbegbe mii bur loho gii syi dyaŋ ncasur wee ke wo ye.

⁹ Tē ba cãã saba wii yrũhũ nɔ wãã ye ye, n ba le yrũhũ u laam wo ma yee, -ye cɛr mpāy na pe tyatyãhã pye.

¹⁰ Driyẽfa mpāy pe tyatyãhã pye, mpāy ne pe yĩnde yi n too nawee- wãn na, pe fufordifa ne, pe mpar yahafa ne, n sē -sē yee -ye cɛr pe na ye kuãŋ ne ye. Mii loo sē ne ye, ye ga waha yi kãã la pe yaha ke driyẽ wo?

¹¹ N ba le yrũhũ ma yee, -ye cɛr ye kuãŋ ne mpāy na pe pe ya ta Yesu kãndeyãrfa, ma - sē tyatyãhã pye, tesē mpāy ne pe yĩnde yi n too nawee- wãn na, mpāy ne pe mpar yaha, pe nagblahafa ne, pe sɛnwɔ nafããn ne, pe fufordifa ne. Ye ma n wãã naa n di ge di pe ne ye.

¹²⁻¹³ Driyẽfa mpāy pe wee Yesu kãnde wo ye, ta wĩ sē ne poo wããhã ne ye. Yãhã kē ke ga

ba pe sãhã. Mpãy pe -sẽ ma le Yesu kãndeyãrfa yawãhã fla wo ye ne, ye yai ye naa poo sãhã, - ye naa ke kai- gbihi! Le ma le yrũhũ yaha Yãhã sabangbãŋ wo ma yee, Yãhã yee: «-Ye u napee cẽr yi kãã ye nsoho wo!»

6

Ye ma syi ye ga naa yii sãhã driyẽfa ye ye!

¹ Ye yawãhãfa laam wo, kai ma wii dye u Yesu kãndeyãrwai ne, u yai la u ga u sãhã kasãhãfa mpãy fla na pe sã cĩnde Yãhã cã ye? U ma ka u ne u Yesu kãndeyãrwai poo yahasee ye, koo sã puar la?

² Ye sã cã la, mpãy pe ma Yãhã wãm, poo me pe ga ba driyẽfa sãhã sukũhũ gaa laam wo? Tee -sẽ ga ba driyẽfa sãhã, ye yai ye waha naa ye kasyĩmbehe gbihi ye nsoho wo yii ya.

³ Ye sã cã la ma yee, wo n pai yãhãyiŋ tẽnlehe sãhã sukũhũ gaa laam wo? Ye -sẽ pye mii ye saa waha driyẽ nge kai- gbihi ye?

⁴ Kai ma -sẽ dye ye nsoho wo, driyẽ nge kasyĩmbehe wĩ na, ye tee n gaha kasãhãfa mpãy fla na pe sã cĩnde Yãhã cã ye.

⁵ Loo nde yĩntaha kẽ, ye laam wo, laantorfua waa wee wii syi tuu ga waha kai war yi u Yesu kãndeyãrwai nsoho wo ye. Fyar yai te ye yigi!

⁶ Tee kai- pãã n taha yii na, le sã yõ ye. Ye tee maha n gaha ke kai- ne kasãhãfa mpãy fla na pe sã cĩnde Yãhã cã ye, loo cã pee.

⁷ Tee yii yee ga n sãhã kasãhã yiŋfa fla na, loo nde ma wa wãpee ye wĩ na. Waa ma kapee laa ter pye ye na, ye tyii le n kua kãã ye laam wo

gbεgbε, kayĩ ne. Waa ma ye koho kla gaa gbe, -ye yaha le le n kua kãã ye laam wo gbεgbε, kayĩ ne.

⁸ Le -sē nde, yii γε me tee kapee- pye ye nampyeŋ- na, ma maha pe koho wãn gbe. Ye Yesu kãndeyãrwai γε me tee nde pye pe na.

⁹ Ye sē cã la ma yee mpãy pe kapee- pye, pe saa ba yãã dye Yãhã yai klo wo ye? Ye ma n yii kar yaha le ne ye: Mpãy pe tyatyãhã pye, ma suhu mpar yahafa ne, tesē cayor lefa ne, tesē mpãy ne pe n sãy pe naawai ne, pe cawai ne,

¹⁰ tesē fufordifa ne, tesē mpãy ne pe yĩnde yi n too nawee- wãn na, tesē sēnwɔ nafããn ne, mpãy ne pe pe nampyeŋ- laam war, mpãy ne pe ma yuhu- naboofa, poo mii bye saa ba yãã dye Yãhã yai klo wo ye.

¹¹ Ye laam wo, mpãy pye ke syi. Ye kapee- -sē yee laha kãã ye na, ye nii Yãhã wãm, ye sron Yãhã yĩnde na Yĩnfua Yesu Crise kãmay na, tesē Yãhã Yrã Fãnga kãmay ne.

Ye kadye ma Yãhã niisaha

¹² Pe n yee, a nawee laam wũhũ bye wãpyeŋ kãnde ma u ye. Cĩinde ne, ke bye sē -sē kē ke yõ ye. Nawee laam wũhũ bye wãpyeŋ kãnde ma sya pye u ye, u sē -sē yai u nii u laam wĩ laa yãmpuai ye.

¹³ Pe n yee, a dir ma laha myaha na, laha ma dir myaha na. Tee -sē le cã ye yee, Yãhã ga ba te bye wĩ kua. Nawee kadye sē -sē nii tyatyãhã myaha na ye. Nawee kadye ma Yĩnfua Yesu myaha na; tesē Yĩnfua Yesu ma nawee kadye myaha na.

14 Yāhā fāngangbāñ kāmāy na, ke ba wo Yīñfua Yesu ta u n yir gbā wo, ma dur ba yrāñ na gbaafa ye mii, ke -sē ga ba wo kadye ta ke n yir gbā wo, ke nii yrāñ na koo syi.

15 Ye sē cā la ma yee, ye kadye ma Yāhā Yīndefua Crise kadye teebehe nkāy? Ye kadye ke -sē ma u Crise kadye teebehe nkāy, ye sē yai syi syi ye ke wāā le canaandi kadye ne ye.

16 Ye sē cā la ma yee, mboo wii ma ka canaandile ye, mboo tesē woo ne, ye ga wāā le, ye nii kadye nen? Loo syi ne le yrūhū yaha Yāhā sabangbāñ wo ma yee: «Naa ma suhu cōo ne, pe ma pe ya gbe, pe ga nii kadye nen.»

17 Wii ma -sē wāā le Yīñfua Yesu ne, u ga nii laantee nen na Yesu ne.

18 -Ye naa n fā tyatyāhā na! Kapee- nkāy ter ma ke pee, ke sē -sē laa pye nawee kadye sraha na ye. Wii u -sē tyatyāhā pye, u le pye u ya koho kadye sraha na.

19 Ye sē cā la ma yee, ye kadye ma Yāhā Yrā Fānga niisaha? Yāhā le wāā ye kē, le ma ye nanem bye laam wo, ye wee yii wām ye.

20 Ye sē yāā, tee par sya yē gii na kacān wee ke na ye. Koo yē kē Yesu Crise ntāñ wāwoo ne. Ye tyii ye kadye pyer n ta, nawee- n naa Yāhā sey!

7

Cōo wāsya wī, naa wāgbe wī ne

1 Tee ba saba wii yrūhū nō wāā ra kē, ye ba ra yey kai- nkāy ne. N ga koo kai- yīntaha yar ye na. Ndoo ye, naa ma yee u sē cōo gbe ye, koo puar.

² Tyatyāhã wĩ na, naa -sẽ yai u cɔɔ sya, cɔɔ -sẽ yai u nii puai ye. Loo ga waha ta tyatyāhã wũhũ saa naa n pye ye.

³ Naa yai u naa u cɔɔ wĩ pye, cɔɔ bya -sẽ yai u naa u puai wĩ pye.

⁴ Cɔɔ kadye wee u ya wãŋ ye, ke ma u puai wãŋ. Puai kadye wee u ya wãŋ ye, ke ma u cɔɔ wãŋ.

⁵ Cɔɔ tesẽ naa ne, ye ma n naa n tyii yii na ye! Ye -sẽ ga waha pãã ta ye tyii yii na plii raa nsoho wo, ye draha yãã ye pãã ma- Yāhã ye. Loo kur ye, -ye dur nii yii ne, mii loo sã ne ye, tee saha yia yii na ye, Setane ga waha yia ye na, u ye ta ye n ga tyatyāhã pye kueŋŋa ye.

⁶ Tẽ ye yar lii ne, n sã yee fãnga wĩ ne ye. Le ma yai wii ye, u ga waha le pye.

⁷ Cɔɔ wee ra ye ye. Nawee- ma ne pye ta wãŋ syi dyaŋ, loo le yõ. Yāhã ke -sẽ fãnga tii wãã nawee- kẽ, te ma te ya wuhu na. Nwo ma fãnga gaa ne, nwo fãnga ter -sẽ ma ke ya ya.

⁸ Mpāy pe ma naandar, tesẽ mpāy ne pe ma cabelar, ma suhu calangusyam ne, pe ma kuee ta wãŋ syi dyaŋ pe ya ya, loo le yõ.

⁹ Pe ma -sẽ yee pe saha yia pe ya na ye, pe pe ya sya, pe nii pe ya ye. Koo puar, pe kuee ke dyaŋ le n naa pe fāy.

¹⁰ Yĩnfua Yesu kãnde nde yar ra na ma yee, cɔɔ ma pye puai ne, u sã yai u u puai sye ye.

¹¹ Tesẽ, cɔɔ ma u puai sye, u -sẽ nii ke dyaŋ, u ma n naa waa gbe ye. Mii loo sã ne ye, u yai u ga wãã le u puai ne. Tesẽ, naa sã yai u u cɔɔ sye ye.

12 Ndoo yē kaplāŋ kē tē ga pāã yagaa. Yesu kāndeyārfua waa ma pye cɔɔ ne, cɔɔ wii u sē Yesu ta u Yater ye, u cɔɔ ma yee u ga kuee u ne, u ma syi u u cɔɔ sye ye.

13 Yesu kāndeyārfua ma pye puai ne, puai wii u sē Yesu ta u Yater ye, u puai ma yee u ga kuee u ne, u ma syi u u puai sye ye.

14 Ye sē yāã, puai wii u sē Yesu ta u Yater ye, u cɔɔ tuu -sē ma Yesu kāndeyārfua, u cɔɔ kāmāy na u crā Yāhā na. Tesē, cɔɔ wii u sē Yesu ta u Yater ye, u puai tuu -sē ma Yesu kāndeyārfua, u puai kāmāy na u crā Yāhā na. Mii loo sē ne ye, pe kicar ga nii mii mpāy dyaŋ pe sē cīinde Yāhā cā ye; pe -sē mii pe crā Yāhā na pe seefa nen kāmāy na, pe seefua wii u ma Yesu kāndeyārfua.

15 Puai wīi na, u cɔɔ ne, wii u sē Yesu ta u Yater ye, woo ma yee u ga u nampyeŋ sye, le ga waha pye. Loo nde na, laa wee pe nsoho wo nantāŋ ye. Wii u ma Yesu kāndeyārfua u tefay yāã. Yāhā wo yee wo nii wii ne yīmbui nen na, yrīŋ ne.

16 Ma sē yāã, mboo naa, ma saha le cā ma yee ma ga waha ma cɔɔ ta u n dye Yesu kānde wo, u wāsyayaha yāã ma wāŋ syi dyaŋ ye. Ma sē yāã, mboo cɔɔ, ma saha le cā ma yee ma ga waha ma puai ta u n dye Yesu kānde wo, u wāsyayaha yāã ma wāŋ syi dyaŋ ye.

-Ye kuee draha gii wo tee pye Yāhā n ba ye yee!

17 Lii le ma yīŋ, tee pye draha gii wo Yāhā n ba ye yee, -ye kuee koo draha wo; loo ma Yīŋfua Yesu laam wīi. Loo kānde nde ne tē n yar Yesu kāndeyārfua yawāhāfa bye na, teebehe bye wo.

18 Wii ma pye u ba kũũ ɛ wa Yāhā n ba u yee, u ma syi u yee u ga dur u u ya ta mii u sē kũũ ye. Wii ma pye u sē kũũ ye Yāhā n ba u yee, u ma syi u yee u ga u ya ta mii u kũũ ye.

19 Ma kũũ woo, yīŋ wee le na ye; ma sē kũũ woo, yīŋ wee le na ye. Lii le ma yīŋ, ma naa n sronj Yāhā kānde katanj wāyār ne.

20 Taa pye draha gii wo Yāhā n ba ma yee, kuee koo draha wo!

21 Ma'a pye yāmpuai Yāhā n ba ma yee, ma'a syi ma naa laam ga ma yāmpar wīi na ye. Ma'a -sē ga waha yi le wo, ma yi!

22 Yāŋ, yāmpuai wii u yee Yesu kānde wo, Yīŋfua Yesu u yi wa u kapee- wāpyeŋ yāmpar wo. Wii u wee yāmpuai ye, u ma yee Yesu kānde wo, u ma Yesu yāmpuai.

23 Ye byɛ, ye par sya yē gii na kacān wee ke na ye. Koo yē kē Yesu Crise ntāŋ wāwoo ne. Loo na, ye ma syi ye nii nawee- laam wūhū yāmpa ye!

24 Wo nna, ye nanem byɛ tee pye draha gii wo Yāhā n ba ye yee, -ye kuee koo draha wo Yāhā yaha ye!

Naandar wīi, cabelar wīi ne, tesē calangusyam wīi ne

25 Ye ba ra yey naandar wīi na, tesē cabelar wīi ne. Yīŋfua Yesu sē kapān laa yar ra na poo wīi na ye. Tuu -sē yō ra na, ma ra ta ta n sronj, n ga waha ta laam wīi yar ye na ye kayey nde wīi na.

26 Kayīhī nihi tɛr yagaa. Loo nde wīi na, lii le yō ndoo ye, le puar naa na u kuee ke dyaŋ.

27 Ma'a pye cɔɔ ne, kuee u ne! Ma'a yee ma wee cɔɔ ne ye, ma'a syi ma waa sya ye!

28 Ma'a cɔɔ sya, kapee sē ne ye. Capua ma nii puai ye, kapee sē ne ye. Pe ma pe ya sya, wāfāy ga ba naa pe dye, n -sē n traha n wāfāy nge kuā ter pe na.

29 Wo nna, lii tē ga pāā ye ye, loo ne nde: Yale sē gbobo kuee wo ye nantān driyē nge wo ye. Ma gbe yagaa na, mpāy pe ma ca ne, pe pe laam miy yaha mii mpāy dyaŋ ca wee pe ye ye.

30 Mpāy pe ma miyāhā na, pe nii pra mii mpāy dyaŋ pe wee miyāhā na ye. Mpāy pe ma nuhu na, pe pe ya ta mii mpāy dyaŋ pe wee nuhu na ye. Mpāy pe ma klafa, pe pe ya ta mii mpāy dyaŋ pe wee klafa ye.

31 Mpāy pe ma driyē kai- yahasee ye, pe pe ya ta mii mpāy dyaŋ pe wee driyē kai- yahasee ye ye. Ye sē yāā, wākueeyaitān wee driyē kai- na ye.

32 N n traha ye ma syi ye naa laam ga ye. Cɔɔ wee wii ye ye, u laam ga Yīnfua Yesu wīī na, u ga pye mii u pyer n naa n tāy Yīnfua Yesu ye.

33 Cɔɔ ma pye wii ye, u laam ga driyē nge wān na, u ga pye mii u pyer n naa n tāy u cɔɔ ye.

34 U laam ma flɛ sīī. Tesē, cɔɔ wii u wee puai ye ye, capua wii ne u wee puai ye ye, pe laam ga Yīnfua Yesu wīī na, pe ga pye mii pe pyer n naa n tāy u ye. Pe n kɛ pe kadye ma suhu pe laam wūhū ne, te naa n laha. Wii u ma puai ye, u laam ga driyē nge wān na, u ga pye mii u pyer n naa n tāy u puai ye.

35 N n traha ye kayūhū yāā, koo kē ta n ye yar kai- ngīī ne. Le sē nii mii fānga wīī laa ne ye. N n traha ye naa ye troho tāhā kānyīī wo, ye ye laam gbihi ta, ye naa n nii Yīnfua Yesu myaha na.

³⁶ Yagaa, naanfuẽ syi tuu ma capua ne, u ga waha le ta u yee, woo saa u sya ye. Kur kuε ye, u naanfuẽ ma ba yee woo tee pye u capua na, u ma maha yee u saha yia naandar na ye, ma yee woo ga u capua sya, le ga waha pye. Kapee sē ne ye.

³⁷ Wii ma -sē yee, woo saa cɔɔ sya ye, woo ga kuee naandaha, le ma pye u ya laam wĩĩ ne, waa yẽ kapān sē ne tuu luhu ye, u ma cã u ga waha yia u ya na, u ma kuee naandaha, loo yõ.

³⁸ Loo na, naanfuẽ tuu kicar yigi, u ma ba u sya cɔɔ, le yõ. Wii ma -sē ba sye, u sē u wũũ sya cɔɔ ye, ma kuee naandaha, loo cã maha yõ.

³⁹ Cɔɔ wii puai ma pye yrāŋ na u sē ku ye, u cɔɔ yai u kuee u puai ye. U puai ma -sē ba ku u yaha, u ga waha nii puai waa ye. Le -sē yai le pye Yesu kãnde na.

⁴⁰ U cɔɔ ma -sē kuee ke dyaŋ calangusya, le ga puar u na. Lii le ma ra ye, loo ne nde: Ta laam wo, n yee Yāhā Yrā Fāŋga kē ke loo yar ra na.

8

Wān tii pe boo mpar wān na

¹ Ye maha ba ra yey wān tii wĩĩ na pe boo mpar wān na. Tee le pãã mii, wo byε kacān yāã. -Tee -sē le cã ye yee, wii ma u ya ta kaicāfua, yatan ma ufua na. Wii ma -sē yee u nampyeŋ- ntāŋ dye u tãy, u koho le pe ye pe laantor wāyāã ne.

² Wii ma u ya ta kaicāfua waa syi ter, ufua sē cĩinde laantor yāã wa ye.

³ Wii ma -sē yee Yāhā wĩĩ gboho u laam wo, ufua cĩinde laantor yāã, Yāhā woo cã yõ.

⁴ Ye ra yey ma yee wān tii pe boo mpar wān na, Yesu kāndeyārfua ga waha te kaa laa, u saha te kaa ye. Wo cā ma yee Yāhā neŋ ya kē ke ma, mpar wān wee ngaa ye.

⁵ Nawee- mpāy ma sya plaha ma n yee, a yāhā busāā ma, yīŋfa busāā ne yāhāyīŋ na kāntraha ne,

⁶ wo cā ma yee Yāhā neŋ ya kē ke ma; koo kē wo bye Tuhufua. Kai- bye yir koo ye, wo bye ma koo wām. Yīŋfua nen ya kē u ma; woo kē Yesu Crise ne. Kai- bye tāhā woo kāmāy na, wo bye n poho woo kāmāy na.

⁷ Too kacān nde wee Yesu kāndeyārfa bye ye. Mpāy ma pe sē cēr wa mpar wān na ye. Loo na, poosyifa ma mpar wān kar kaa, pe laam saa sya ye, pe ga naa pe ya yāŋ mii pe tee pye, pe wee gbegbe ye.

⁸ Kar saha nawee ta u n crā Yāhā na ye. Wii ma yee u sē te kaa ye, laa kayīī sē ne le ter u yaha ye. Wii ma te kaa, laa kayīī sē ne tuu ga yāā ye.

⁹ -Tee -sē yii yigi, lii tee cā ma n pye, le ma syi le mpāy ta pe n dye kāmpee wo ye, mpāy pe sē wlaha le Yesu kānde wo ye!

¹⁰ Poo nen waa syi ma ma yāā, mboo wii taa ma kaicāfua, ma maha nii kar kaa mparyaha kangbāŋ wo, u saha le war ye. U laam wo kapee ne. Tuu -sē ma yāā le na, u bya ga dye le wo, u naa te mparyaha wān kar kaa.

¹¹ Loo nde na, u Yesu kāndeyārwe nwo wii u sē wlaha le Yesu kānde wo ye, mboo kacān ta u n dye kāmpee wo. Le -sē nde, u Yāhā Yīndefua Crise ku woo bya wīī na.

¹² Ye Yesu kāndeyārwei mpāy pe sē wlaha le

Yesu kãnde wo ye, ye ma tee n pye pe na, ma pe laam wlãhã, ye kapee pye u Crise gε na ke syi ne.

¹³ Loo ne, tē cã n ma nii mpar wãn kar kaa, ta Yesu kãndeyãrwe ma ra yãã, le ga u laam wlãhã, u n dye kãmpēe wo, n ga yi kãã too syi kar nde wãkaa wo ta kuãñ ne; n ma syi n ba ra nampyen waa ta u laam n wlãhã u ye, u n dye kãmpēe wo ye.

9

Pol yee Yesu gε kē u woo lεhε wãã

¹ Ta laam wee la pra driyē nge kuε ye? N wee la Yesu Crise tēnlēhε? N sē wo Yīñfua Yesu yãã la yīnde ne? Ndoo sē na tē Yīñfua Yesu tēn tē ye fla na, ma ye ta ye n nii Yesu kãndeyãrfa?

² Mpãy ter ma sya yee ndoo wee Yesu tēnlēhε ye, yii poo yai ye cã ye nii Yesu kãndeyãrfa ndoo kãmay na. Loo nde le yar, n ma Yīñfua Yesu tēnlēhε.

³ Mpãy pe ra wãpee pãã, tē ga lii yar pe na, le nde:

⁴ Too ma wo tēn na, wo bya sē yai la wo wo yē digi yãã, tesē wo lawoñ ne?

⁵ Wo sē yai la le ma tãy wii ye, u Yesu kãndeyãrwaisya waa ta u cɔɔ, u n naa n taha u na u tēn na, mii Yesu tēnlēhε mpãy wãñ syi dyañ, tesē u Yīñfua Yesu cĩfa ne, tesē Pyar ne?

⁶ Wii wo syãm ya la ta tēntēwε Barnabaase ne, too yai wo naa tēn tē, wo cã naa wo yē digi yãã?

⁷ Ye le luhu yãã la pe yee, nawee ma dye seraasyiya wo, woo tuu u ya dãã u ya ya? Laa, nawee ma katyir tar le, u sē yai u te katyisan di

ye? Laa, yanaha tuu yar tii naha, u sē yai u too nayĩm wo ye?

⁸ Ye ma syi ye yee naweetee laam wũhũ kē tē n pãã ye ye ye! Yãhã kãnde katan̄ ge koo ngĩ yar.

⁹ Ye sē yãã, kãnde lii Yãhã bii le le soho Musa koho wo faale wo, le fla ngaa le yar ma yee:

«Pe naha gii ta ma yee

ke dir pua tãhã naa n yi te syir wo,

pe sē yai pe koo naha yẽ pua tã

too dir nde na ye.»

Ye yee la, yar ya wĩ ne Yãhã bii naa n pãã koo fla na?

¹⁰ Wii bya sē na Yãhã naa n yãŋ, wii mpãy too ma ke tēntē-? Āwã, le kapãn nde pãã wii ge wĩ na. Wii u tar war, tesē wii ne u te dir sege ma u pua yi, pe bye pe tēn tē, ma yee pe ga ba pe dir lay yãã.

¹¹ Wo le Yesu kapãyĩ pua tãhã le ye laam wo. Loo nde na, wo sē yai la wo -sē ye koho wãn taa yãã ke draha wo?

¹² Mpãy ter ma, pe ye koho wãn taa sya ye ye. Wii poo sē cã yai la, wo ye koho wãn yãã, wo ta ter poo yaha? Wii sē -sē wo dããn yey yãã ye ye ye. Wo yer wãfãy ter bye wãsyãŋ na, ma yee wo saa laa ta lii syi le ga waha yer tã le Yãhã Yĩndefua Crise kapãyĩ wãkan̄ na yaha ye ye.

¹³ Ye sē cã la ma yee, mpãy pe tēn tē Yãhã kangbãŋ wo, pe yẽ digi n yi koo fla na? Mpãy pe tēn tē Yãhã diŋ yisaha wo, pe ne pe lay yãã ke diŋ na.

¹⁴ Yĩŋfua Yesu ge maha le yar ma yee, mpãy pe ma le kapãyĩ pããfa, pe yai pe naa pe dãã loo tēn na.

15 N sē -sē ta tēn dāān wīi yey yāā waa ye ye. N sē maha saba nwo yrūhū nō wāā ye ye ma yee, n ga ye yey loo ne ye. Loo nde ma ta ye miyyūhū. N ma sya ga ku loo wīi na, n ga yer le na.

16 Tē sya le kapāyīi pāā, n saha nii sey loo wīi na ye. Ye sē yāā, n taha loo tēn nde na; n ma sye n sē le kapāyīi pāā ye, ta wīi ga pee.

17 N ma le tēn tē yō nuhu ne, n ga le dāān yāā. Le ma -sē nii mii tēn dyaŋ pe ra taha le na, n yai n le tē wātē ya.

18 Ta dāān -sē ma lii ne? Loo ne, n naa le kapāyīi pāā nawee- ye faa, n ma n naa le tēn dāān sya ye.

19 Tē sya ma pra, n wee waa yāmpuai ye, n nii ta nawee- ter bye yāmpuai draha syi wo. Loo na, n ga waha nawee- busāā yāā, pe n dye le Yesu kānde wo.

20 Tē pye Yiiffee- nsoho wo, n ba nii ta pe wāŋ syi dyaŋ. Loo ga ta ra n pe yāā pe n dye le Yesu kānde wo. Mpāy pe Yiiffee- kānde yār, tē pye pe nsoho wo, tē sē -sē wee n pe kānde yār ye, n ba nii ta pe wāŋ syi dyaŋ. Loo ga ta ra n pe yāā pe n dye le Yesu kānde wo.

21 Mpāy pe wee Yiiffee- ye, pe sē Yāhā kānde yār ye, tē pye pe nsoho wo, tē -sē ma Yāhā kānde wo, ma Yesu Crise kānde yār, n ba nii ta pe wāŋ syi dyaŋ. Loo ga ta ra n pe yāā pe n dye le Yesu kānde wo.

22 Mpāy pe sē wlaha le Yesu kānde wo ye, n ba nii ta pe wāŋ syi dyaŋ. Loo ga ta ra n pe yāā, n pe ta pe n wlaha le Yesu kānde wo. N naa nii ta nawee- ter bye wāŋ syi dyaŋ, ma yee le ma sya klaha mii, nanem mpāy ga wāsyayaha yāā

pe laam wo.

²³ N kai- bye pye le kapäyĩĩ wĩĩ na, ma yee ta bya ga ba ta lay yãã.

-Ye yii plãhã, ye yahasee fla yãã le Yesu kãnde wo!

²⁴ Ye cã ma yee, mpãy bye pe pe ya kihi fee ne nantrangbãñ fla wo, pe bye n fã, nen ya -sẽ kẽ tuu ga yahasee fla yãã pe laam wo, u dããn yãã. Yii mpãy tee -sẽ ma le Yesu kãnde wo, -ye yii plãhã ye yahasee fla yãã le laam wo!

²⁵ Mpãy bye pe n pai le fee fã, pe ga cãã naa pe ya gbihi, pe naa pe ya plãhã kai- bye ne. Pe ga naa koo bye pye pe ba waha yahasee fla yãã, pe te dããn yãã. Pe dããn -sẽ pye driyẽ kla, ke ga ba klaha-. Wii mpãy too -sẽ ma le Yesu kãnde wo, wo ma yahasee fla yãã, dããn tii too ga yãã, driyẽ kla sã kẽ koo ne ye, koo ma wãklahayãã wee ke na ye.

²⁶ Loo ne, ndoo ra fee fã le Yesu kãnde wo, ma yahasee fla wĩĩ ya yãñ. N maha ma mii mpãy dyañ pe pe ya sugu kãntakloñ ne; ndoo sã -sẽ sugu faa n laa ye.

²⁷ N n yia ta kadye na, n ta kadye wãyigi cã. Mii loo sã ne ye, ndoo wii n nawee- klaha le Yesu kãnde wãyãr ne, n ga ba kuee kur ye.

10

Ye ma syi ye Yiifee- wãlẽ wãñ syi pye ye!

¹ Wo nna, ye ma syi ye faha wo faale wãlẽ wĩĩ na, pe pye yrãhã na tãyãfũũ klo wo, wo faale wãdyaha Musa ne ye. Yãhã bii yãhãsyõr raa ta pe yĩñ na, pe bye n naa n taha too yãhãsyõr

na. Yāhā bii pe ta pe bye n waha dye yi ter muhulangbāŋ telai wo, loho sē nɔ gɛ nɔ pe na ye.

² Te yāhāsýõr wĩ, ke muhulangbāŋ wĩ ne, le bii nii pe bye ye wātāā gaa dyaŋ Musa myaha na.

³ Digi gii ke pye pe ye, pe bye n naa n di, ke naa n yir yāhāyĩŋ na.

⁴ Yāhā naa loho ta ke n naa n yi ntēmbangbāŋ gaa wo, pe bye n naa n wɔ. Koo ntēmbangbāŋ wĩ bii nii mii Yāhā Yĩndefua Crise dyaŋ, tuu pye pe ne, ma naa n taha pe na.

⁵ Loo naa bye ne, pe nawee- fānga busāā sē naa n luhu Yāhā ye ye, ma ku le tēyāfũũ klo wo.

⁶ Koo kai- ngĩ ke wo klaha kai- busāā ne, wo ma syi wo nii wo wāle wāŋ syi dyaŋ, wo naa wo lampee wũhũ ke ye.

⁷ Ye ma syi ye nii poo mpāy wāŋ syi dyaŋ ye naa mpar wān tēŋ ye. Le ma le yrũhũ yaha Yāhā sabangbāŋ wo pe wĩ na ma yee: «Pe nawee- tege nii, ma di, ma wɔ. Loo kur ye, pe n yir, ma gbar.»

⁸ Ye ma syi ye dye tyatyāhā wo ye, mii wo wāle mpāy dyaŋ pe bii pe ya le le wo. Nawee- nyer sēnsye nen yĩbua n sya bii ku pe laam wo, per neŋ loo nde wĩ na.

⁹ Ye ma syi ye Yĩnfua Yāhā tān yāŋ ye, mii poo mpāy dyaŋ pe bii le syi pye le tēyāfũũ klo wo. Yāhā n nwɔr ta te n nabuar nɔ boo pe laam wo.

¹⁰ Ye ma syi ye tee naa pāā Yāhā wĩ na ye, mii wo wāle mpāy dyaŋ pe bii le syi pye. U gbāfua n bii pe boo.

¹¹ Koo kapee- ngĩ ke wo wāle dye, ke wo klaha kai- ne. Ke yrũhũ yaha Yāhā sabangbāŋ wo wii wĩ na, wo waha wii wāyigi cā, wo ma syi wo

naa n pye pe wāŋ syi dyaŋ ye. Ye sē yāā, wo ma cāā gii na yagaa, driyē kuayale gbe taha.

¹² Loo nde na, wii ma yee woo wlaha yō le Yesu kānde wo, u naa u ya yigi, u ma syi u ba tra yi kāā le wo ye.

¹³ Fānga gii ke ye tyīn n gaha kapee- wāpyeŋ kue ye, ma sya ba waa yagaa na, ke ga waha nawee- bye dye. Yāhā yē ter koho wāleŋ ne wo ye, ke n sroŋ, ke saa sya koo fānga nge n ter nawee fānga na ye. Koo fānga nge ma nii ye tyīn n gaha kapee- wāpyeŋ kue ye yaliile wo, loo yale wo, Yāhā ga fānga gaa wāā ye kē ye n waha yia, ke maha ye ta ye n yi le wo.

¹⁴ Ta tāāfa, loo nde na, ye ma syi ye naa mpar wān tēŋ ye!

¹⁵ Tee ma kaicāfa, lii tē n pāā, -ye yāŋ le le wo!

¹⁶ Wo ma wii wāā, ma nii defī wāā n wo sekui wo, syaha wāwāā wī na Yāhā kē, loo yīntaha kē nde: Wii mpāy bye too wāā wo, wo bye seefar le u Yāhā Yīndefua Crise ntōr kāmāy na. Wo ma bur la cεr, ma nii wāā n di, loo yīntaha kē nde: Wii mpāy bye too wāā di, wo bye seefar le u Crise kadye kāmāy na.

¹⁷ Bur neŋ ya kē ke ma. Too sya nihi mii koo bur na, wo bye wāā le, ma nii mii kadye nen dyaŋ. Ye sē yāā, bur neŋ ya kē wo bye too wāā n di.

¹⁸ Ye maha cā ma yee, wān tii Yiisrefa pe boo, ma diŋ yi Yāhā kē, mpāy pe too wān kaa, pe seefar le ke Yāhā diŋ yisaha fla ne.

¹⁹ N sē -sē yee pe ma wān boo mpar na, yīŋ ma too mpar na, tesē wān tii ne pe boo ye. Aye, le wee ke syi ye.

²⁰ N yee, wān tii pe boo mpar na, te ma sândāpee wān, Yāhā wān sē ne ye. N sē -sē n traha ye naa too wān nde kaa, ye seefar le sândāpee ne ye.

²¹ Ye saha naa n wo Yīñfua Yesu sekui ne, -tee maha ga naa n wo sândāpee sekui ne ye. Ye saha naa Yīñfua Yesu dir di, -tee maha ga naa sândāpee dir di ye.

²² Wii ma loo pye, le sē sron Yīñfua Yāhā ye ye, le saa t̄y ke ye ye. Ye yee la ye fānga ter Yāhā wāñ yaha?

-Ye naa Yāhā miingbāñ ke ye kānkai- bye wo!

²³ Mpāy n yee, a kai- bye wāpyeñ kānde ma nawee ye. Cīnde ne, kai- bye sē -sē yō ye. Kai- bye sē maha kē ke laa yō Yesu kāndeyārfa kē ye.

²⁴ Waa ma syi u naa u ya diñ wī loo kar ye. Lii le ga nii kayī u nampyeñ- bye ye, u naa loo ke.

²⁵ Kar rii bye pe n par kar parsaha wo, ye ga waha te bye kaa. Loo kur ye, ye ma syi ye -sē waa yey te kar yisaha ne ye! Mii loo sē ne ye, laa na ye laam saa sya ye ye ye.

²⁶ Ye sē yāā, le ma le yrūhū yaha Yāhā sabangbāñ wo ma yee: «Driyē nge ma suhu ke wān bye ne, te ma Yīñfua Yāhā wān.»

²⁷ Wii u wee Yesu kānde wo ye, woosyifua ma ye yee dir na u kaha wo, le ma t̄y ye ye, ye ka. Pe ma dir rii wāā ye kē, ye te di. Ye ma syi ye -sē waa yey nwa syi dir ne ye! Mii loo sē ne ye, laa na ye laam saa sya ye ye ye.

²⁸ Waa ma -sē ye cāā yar ma yee, mpariyaha kar ne pe soho, woofua wī na, ye ma syi ye te dir di ye! Ke syi, waa laam saa wlāhā u ye ye.

²⁹ Ye laam ma sya yee pe sē wlāhā ye ye ye, wii u te mpanyaha kar wīi pāā ye ye, woo laam ga waha wlāhā u ye. Laa na, waa ga yee, a woo kalaa ma la waa ter laam wāwlāhā wīi ya na, a woo sē yai la u waha u ya laam wīi pye,

³⁰ a woo ma cāā syaha wāā Yāhā kē te dir wīi na, nwa pe n ga maha yee woo tee pye te dir wādi wīi ne?

³¹ Loo nde na, digi kē tee n di woo, ngaa kē tee n wo woo, ngii ngii tee n pye woo, -ye naa Yāhā miingbāŋ koo ke ye kānkai- bye wo!

³² Mpāy pe ma Yiifēe-, mpāy ne pe wee Yiifēe-ye, mpāy ne pe ma Yesu kāndeyārfa yawāhāfa, ye ma syi ye ta ye wīi n nii pe ye ntēmlaha gii syi dyaŋ pe n kūn ke na, ma n too ye!

³³ -Ye naa n pye ra dyaŋ! N nii plāhā, ma n ke ta wīi n naa n tāy nawee- bye ye, ta kānkai- bye wo. Nii wīi sē ne tē n kar ye, nawee- bye kayīi ne tē n ke pe kē, pe n wāsyayaha yāā.

11

¹ Tē n yāŋ u Yāhā Yīndefua Crise na mii, ye bye ye naa n yāŋ ra na ke syi, -ye ra pyer gbe!

Cɔɔ yai u naa u ya yigi mii

² Ye sē n faha ra wīi na kānkai- wo ye. Tesē, tē ye klaha kai- nkāy ne, ye ke pye. N ye sey koo ngīi wīi na.

³ N -sē n traha ye maha nde cā taha: U Crise woo u ma naa yīŋfua, naa woo u ma u cɔɔ yīŋfua, Yāhā koo -sē ma u Crise yīŋfua.

⁴ Yawāhā fla wo, naa ma nii n pāā Yāhā ye, laa na Yāhā ke kapān laa le u laam wo, u n nii le tōr

pe yawāhāfa ye, u ma -sē pye u u yīŋ tã tã ngaa ne, u u Yīŋfua Yesu myaha klaha- ke syi ne.

⁵ Le ga waha pye cɔɔ kē tuu n pãã Yāhā ye ke yawāhā fla wo, laa na Yāhā ke kapān laa le u laam wo, u n nii le tōr pe yawāhāfa ye. Woo ma pye u sē u yīŋ tã tã ngaa ne ye, u u puai myaha klaha- ke syi ne. U ma wācɛŋ cɔɔ wii ne u yīŋ byɛ kur kãã.*

⁶ Cɔɔ wii ma yee, u sē u yīŋ tã n tã ngaa ne ye, u yai u yīŋ kur kãã. U ma -sē cã ma yee, yīŋ wākur wīi ma fyaryigi wīi, u -sē ke tã naa n tã ngaa ne.

⁷ Naa woo na, u sē yai u u yīŋ tã naa n tã yawāhā wo ye, Yāhā woo ta u n ke tay, koo kē. Naa woo u ga waha Yāhā myaha gbobo. Cɔɔ woo -sē kē u ga waha u puai myaha gbobo.

⁸ Ye sē yãã, Yāhā sē cɔɔ tãhā ma u teelaa yi ma naa tãhā ye. Naa woo kē Yāhā u tãhā, ma u teelaa yi ma cɔɔ tãhā le ne.

⁹ Tesē, Yāhā sē naa tãhā cɔɔ wīi na ye, cɔɔ woo kē Yāhā u tãhā naa wīi na.

¹⁰ Loo ne, cɔɔ yai u ngaa tã naa n tã yīŋ na yawāhā wo, pe n cã u yīŋ kor le u puai ye. Yāhāyīŋ tēnlɛɛ ma loo yãã, le n tãy pe ye.

¹¹ Too -sē ma Yīŋfua Yesu kãnde wo, naa wīi ma cɔɔ na, cɔɔ wīi bya ma naa na.

¹² Ye sē yãã, Yāhā ke naa teelaa yi ma cɔɔ tãhā mii, Yāhā maha ta, naa see n yi cɔɔ wo koo syi. Koo kai- byɛ yir Yāhā ye.

¹³ Yii gɛ, -ye le waha yãŋ! Le sron la cɔɔ u naa n pãã Yāhā ye yawāhā wo, mii u sē u yīŋ tã tã

* **11:5 11.5** Cɔɔ wii pe u yīŋ kur kãã, canaandile kē Korntifa ye koo cãã na.

ngaa ne ye?

¹⁴ Naa u ma mii, u ma u yĩnyor ta te n tyĩ ga far ter, le ga nii fyaryigi wĩ.

¹⁵ Coo woo -sẽ nwo, u ma u yĩnyor ta ke syi, le ga nii myaha ne. Ye sã yãã, coo yĩnyor n tyĩ, ma u yĩn tã n tã.

¹⁶ Kaplãn wãtyĩn wĩ ma pye wii laam wo yĩn wãtã wĩ nde na, u cã wãcãn ya u yee, wii tesẽ teebɛɛ byɛ Yesu kãndeyãrfa yawãrfa ne, troho wãtãhã gaa ter wee wo ye ye.

Yĩnfua Yesu digi wãdi

(Mat 26.26-29; Mar 14.22-25; Luke 22.15-20)

¹⁷ Kai- nkãy tẽ ga pãã yagaa ye wĩ na, n saha ye sey ke wĩ na ye. Ye ma yii wãã, ye sã kayũhũ pye ye, ye kapee- koo kẽ ke cã pee n gaha ye ye.

¹⁸ Pe ra cãã yar ma yee, ye ma yii wãã yawãhã na, ye yĩmbuhu sã wãã le ye, ye ma creŋcreŋ. Ta laam wo, le ga waha pye cĩnde.

¹⁹ Ye ma nii creŋcreŋ, loo ge ga ta le n cã mpãy poo me pe n sroŋ le Yesu kãnde wãyãr ne ye laam wo.

²⁰ Ye ma yii wãã, ma yee yaa Yĩnfua Yesu digi wãdin di, loo sã ne tee n pye ye.

²¹ Ye sã yãã, ye ma yee yaa di yaliile wo, wii ma pa digi gii ne, ufua ga ke kur di u ya ya. Mpãy ga kuee fãã ne, mpãy -sẽ ga di, pe maha defĩ wo u n sya pe yigi.

²² Klɛ wee la ye ye, ye n ga naa n di, ye naa n wo te wo? Ye yee la Yãhã kãndeyãrfa yawãhãfa wee ngaa ye? Ye n ke la ye naa fyar yaha mpãy na ngaa wee pe ye ye? Ye yee n maha lii pãã ye

ye? Ndoo woo na, n saha ye sey kueekuee loo nde wĩ na ye.

²³ Kaklaha gii tē yāã Yĩnfua Yesu ye u dir wādiŋ wĩ na, n le cāã yar wa ye na, loo ne nde: Yĩmper gii laam wo, pe ba Yĩnfua Yesu yi u napĩ- kē, koo yĩmper wo, u ba cāã bur gbe,

²⁴ ma syaha wāã Yāhā kē, ma ke bur la cεr, ma u kānyārwei pye ma yee: «-Ye sya di, ke ma ta kadye draha wo, ta kadye gii ke wāã ye wĩ na. -Ye naa ke syi pye ye naa ye laam too ra wĩ na!»

²⁵ Pe di wa, u n defĩ sekui gbe, ma u kānyārwei pye ma yee: «Defĩ nwo ma ta ntōr draha wo, ta ntōr rii kāmāy na Yāhā naambiyārfān le nawee-ne. -Ye naa defĩ wɔ koo syi ya dyaŋ yalebyε, ye naa ye laam too ra wĩ na!»

²⁶ Ye sē yāã, yalebyε ye ma nii bur di, ma nii defĩ wɔ koo syi ya dyaŋ, Yĩnfua Yesu wāku wĩ ne tee n yar, u wādurba per n sya ba nɔ.

²⁷ Loo ne, ye yawāhā wo, wii ma Yĩnfua Yesu digi wādiŋ syi di, ma u defĩ wāwɔŋ syi wɔ, u laam yai pe sron. Mii loo sē ne ye, u kapee pye Yĩnfua Yesu kadye na, tesē u ntōr ne.

²⁸ Nawee yai u u ya yāŋ wa, tuu cā Yĩnfua Yesu digi wādiŋ syi di, u defĩ wāwɔŋ syi ne.

²⁹ Ye sē yāã, wii ma Yĩnfua Yesu digi wādiŋ syi di, u defĩ wāwɔŋ syi ne, u yai u cā digitrihi ya sē kē u n di ye. U yai u cā ke ma Yĩnfua Yesu kadye gε draha wo. Mii loo sē ne ye, Yāhā ga u pēn.

³⁰ Ye sē naa loo yāŋ ngaa ye; loo ne, ye laam wo nawee- busāã ma pe kadye teelaa klaha- pe ye, mpāy ma pe n yaa, mpāy ne pe ku.

³¹ Wo ma -sē yāŋ n le wo kapee- wāpyeŋ wo, wo saa pēn nantāŋ ye.

³² Yāhā ma -sē wo pēn, ke laantor le wo laam wo. Loo nde na, wo wīi saa ba pye klaha- driyēfa ne ye.

³³ Wo nna, loo ne ye ma yii wāā ma yee yaa Yīŋfua Yesu dir di, -ye naa yii sēŋ!

³⁴ Ye ma cā fāā ye yigi, -ye cāā di ye kle wo! Loo na, ye saa ba tee naa n pye laa ne ke yawāhā wo, ye wāpēn yāā le na ye. Kai- nkāy ke kuee, n ma ba ka ye fla na, n ga ke war yi.

12

Yāhā Yrā le fānga tii wāā nawee- kē

¹ Wo nna, Yāhā Yrā le fānga tii wāā nawee- kē Yāhā tēn wīi na, n n traha ye ke bye cā.

² Ye cā ma yee, tee sē ba cīinde Yāhā cā wa ye, fānga gaa ter ba ye tyīn naa n gaha yalebye mpar wān kue ye, too tii te sē n pāā ye.

³ N n traha ye le cā laha ye yee, Yāhā Yrā Fānga ma pye wii laam wo, u saha yoosēn pāā Yīŋfua Yesu kē ye. Tesē, wii ma yee Yesu ma Yīŋfua, Yāhā Yrā Fānga ma u laam wo, koo kē u n waha le pāā.

⁴ Yāhā tēn fānga ter ma te ya wuhu na. Yāhā Yrā nen ya -sē ne, le te wāā nawee- kē.

⁵ Yīŋfua Yesu nawee- taha tēŋ nkāy na, ke tēŋ wee wāceŋ ye. Ke tēŋ bye -sē n tē woo ya kē.

⁶ Kai- busāā n pye, koo Yāhā neŋ ya -sē kē ke n ta nawee- n waha koo kai- pye.

⁷ Nawee nawee woo, Yāhā Yrā fānga gaa wāā u kē, fānga gii ke ga waha laa yō Yesu kāndeyārfa kē.

⁸ Ye sē yāā, Yāhā Yrā ga fānga wāā waa kē u n waha naa laantor kaplāŋ pāā. Le ga maha waa ter ta u n Yāhā wūhū cā yigi, u naa ke pāā nawee-ye.

⁹ Loo Yāhā Yrā nen ya kē, le ga maha fānga wāā waa ter kē u n Yīŋfua Yesu sronj ta u Yater kānkai- bye wo. Le ga maha waa ter ta u n waha naa yanfa jaa.

¹⁰ Le ga maha waa ter ta u n waha naa laanwo wūhū pye. Le ga maha waa ter ta u n waha naa Yāhā kaplāŋ luhu u laam wo, u naa ke tōr nawee-ye. Le ga maha waa ter ta u n Yāhā Yrā kai- cā war naa n yi, kai- nkāy ne ke wee Yāhā Yrā wūhū ye. Le ga nwo ta u n waha naa yor raa ter syi pāā. Le -sē waa ta u n waha too yor ter nde kaplāŋ cā naa n tōr nawee- ye.

¹¹ Loo Yāhā Yrā nen ya ne, le koo kai- ngīi kur bye pye. Nawee nawee woo, Yāhā Yrā ga fānga wāā ufua kē le laam wāwāā, fānga gii syi ke saa pye wāceŋ u nampyeŋ wāŋ ne ye.

Yesu Crise ma mii syi u kāndeyārfa ne?

¹² Ye cā kadye nen ma teebehe busāā ne. Ke teebehe wee wāceŋ ye, ke kur bye -sē kē ke wāā le, ma nii kadye nen. Yesu kāndeyārfa yawāhāfa kur bye wīi ma koo syi dyaŋ. Yāhā Yīndefua Crise kāmāy na, pe bye wāā le, ma nii mii kadye nen ya dyaŋ.

¹³ Wo kur bye, mpāy pe ma Yiifee-, mpāy ne pe wee Yiifee- ye, mpāy ne pe ma yāmpa, mpāy

ne pe wee yāmpa ye, wo bye tãã yi loho wo, ma wãã le, ma nii kadye nen dyaŋ loo Yãhã Yrã nen ya kãmay na. Le maha wo laam yĩĩ.

¹⁴ Kadye ma teebɛɛ busãã ne, tee nen ya sê ne ye.

¹⁵ Troho ga waha yee, koo wee koho draha syi wo ye, a loo nde na koo wee kadye teelaa ye. Ke ma sya loo pãã, loo kapãn nde ga waha ta la ke saa nii kadye teelaa ye?

¹⁶ Ndityɛ ga waha yee, koo wee yĩnde draha syi wo ye, a loo nde na koo wee kadye teelaa ye. Ndityɛ ma sya loo pãã, loo kapãn nde ga waha ta la le saa nii kadye teelaa ye?

¹⁷ Kadye teebɛɛ bye ma ne pye tãŋ yĩmpɛ fla, kadye ne ga pye mii ke naa n luhu? Ke ma -sê ne pye tãŋ ndityuhu fla, kadye ne ga pye mii ke naa dugu luhu?

¹⁸ Ye sê yãã, Yãhã kê ke kadye teebɛɛ bye ta te dre wo, ke laam wãtaŋ.

¹⁹ Kadye ma ne pye teele nen laa ya ne, ke saa ne pye kadye ye.

²⁰ Lii ya le ma cĩinde, teebɛɛ busãã kê ke ma kadye nen ya na.

²¹ Yĩnde saha koho pye le yee, koho wĩĩ wee loo na ye. Tesê, yĩŋ saha trɛ pye ke yee, trɛ wĩĩ wee koo na ye.

²² Aye, loo saha pãã ye. Kadye teebɛɛ nkãy gɛ fãnga wee ke na ye, ke ma yee ke wee ye, kadye saha poho ye.

²³ Tesê, kadye teebɛɛ nkãy gɛ waa sê ke yãŋ ngaa ye, wo sê n faha ke wĩĩ ne ye. Loo ne, kadye teebɛɛ nkãy waa sê ke yãŋ ye, wo ke gbihi n yigi.

24 Teebehe nkāy wo ke yāṅ, ke wāgbihiyigi wīi wee wo na ye. Kadye teebehe nkāy waa sē naa ke yāṅ ngaa ye, Yāhā ta wo koo bya yāṅ kadye teebehe bye ne wāceṅ.

25 Loo nde na, kadye teebehe saa naa n wāā ke ya ne, ke ceṛ ke ya na ye. Ke ga wāā le, ke ke ya gbihhi naa n yigi.

26 Tesē, teele nen ma n yaa, le ga nii mii kadye teebehe bye dyaṅ ke n yaa. Tesē, kadye teele nen ma miiyūhū yāā, le ga nii nuhu wīi kadye teebehe bye ye.

27 Ye bye ye ma u Crise kadye, ye nanem bye ma u kadye teele laa.

28 Loo ne, Yesu kāndeyārfa yawār teebehe bye wo, Yāhā cāā Yesu tēnlēhe poo ta. Syāṅ wuhu, ke mpāy ta pe waha naa ke kaplāṅ luhu pe laam wo, pe naa ke tōr nawee- ye. Tāā wuhu, ke mpāy ta pe naa le Yesu kapāyīi klaha nawee- ye. Loo kur ye, ke fānga wāā mpāy kē pe n waha laanwo wūhū pye, ma mpāy ta pe n waha yanfa jaa, mpāy ne pe koho le nawee- ye, mpāy ne pe ga waha nii yīṅfa, mpāy ne pe ga waha naa yor raa ter syi pāā.

29 Pe bye wee Yesu tēnlēhe ye, Yāhā sē pe bye ta pe n waha ke kaplāṅ luhu pe laam wo, ma ke tōr nawee- ye ye. Pe bye wee le Yesu kapāyīi klaha ye. Pe bye wee laanwo wūhū pyefa ye.

30 Pe bye wee yanfa wājaa fānga ne ye. Pe bye sē me pe ga waha naa yor raa ter syi pāā ye. Pe bye sē me pe ga waha naa too yor ter nde kaplāṅ cā naa n tōr nawee- ye ye.

31 Yāhā tēn fānga tii te sroṅ yō, -ye naa too ke!

N ga kãnde laa yar ye na, lii le yõ tãŋ too Yãhã tẽn fãnga nde bye na.

13

Lii le ma yĩŋ, ma ter kai- bye yaha

¹ N ma sya waha driyẽ yor ter bye pãã, tesẽ yãhãyĩŋ tẽnlehe yor bya ne, n ma -sẽ yee nawee-ntãŋ sã dye ra tãy ye, ta yẽ kaplãŋ ga nii yĩŋ saa pye ke na ye. Ke ga nii mii gblen ya dyaŋ yĩŋ wee ke na ye, gbengben gblen dyaŋ.

² Laa na, n ga waha fãnga yãã, n naa Yãhã kaplãŋ luhu ta laam wo, n naa ke tõr nawee-ye. Tesẽ, n ga maha waha Yãhã wũhũ war, n ke kai-bye cã. Tesẽ, n ga maha waha Yesu ta ra Yater, n sya waha naa yãy ta te n yũhũ naa n kãã. N ma sya waha koo kai- ngĩ bye pye, n ma -sẽ yee nawee-ntãŋ sã dye ra tãy ye, n wee ngaa ye.

³ N ga waha ta koho wãn bye la klaha nawee-kẽ, n ga waha le sya n nii wãã pe n ta kadye sraha suhu naa laam wo le kapãyĩ wĩ na; n ma -sẽ yee nawee-ntãŋ sã dye ra tãy ye, koo bye saa laa yõ waa kẽ ye.

⁴ Wii, nawee-ntãŋ n dye u tãy, ufua ma laanyĩn ne, u laam n tãy, u yĩnde sã yi n too waa kla na ye, u sã u ya sey ye, yataŋ wee u na ye.

⁵ U sã fyaryigi wũhũ pye ye, u sã u ya ya diŋ ya ke ye, u sã ncafũhũ di ye. Nawee ma laa tee pye u na, u ga tyii le n kua kãã u laam wo gbegbe.

⁶ Kai- nkãy ke sã sron ye, ke sã n tãy u ye ye. Kai- nkãy ke sron, koo ke n tãy u ye.

⁷ Wii, nawee-ntãŋ n dye u tãy, u n tyii nawee-kapee- foho na u kuãŋ ne. Kãnkai- bye wo, u

Yesu ta u Yater, u koho taha n yaha Yāhā na, u laanyĩn yāā.

⁸ Wākuayāā wee ntāŋ wādye wĩ loo na ye. Yāhā kaplāŋ nkāy nawee ga waha ke luhu u laam wo, loo nde ga ba kua per gaa. Yāhā kaplāŋ wāpāā yor raa ter syi wo, loo nde ga ba kua per gaa. Kacān wūhū ga ba kua per gaa.

⁹ Ye sē yāā, wo saha kacān wūhū bye cā tāŋ ye. Yāhā kaplāŋ nkāy le wo laam wo, ke nanen ya too n war, ma ke tōr nawee- ye.

¹⁰ Kai lii le le ya kua, loo ma ba pa yaliile wo, kai- nkāy ke sē ke ya kua ye, koo wūhū -sē ga ba kua kāā.

¹¹ Tē pye kicar, n naa n pāā, ma naa laam ga, ma naa kai- yāŋ kicar wāŋ syi dyaŋ. Tē ba ɛ wa, n kicar wāŋ miy yaha.

¹² Nanga nge na, le ma mii wo ke Yāhā wūhū yāā yirfayāŋ ya wo, cāā- biibiile ya na. Sukūhū gaa laam wo, wo ga ba ke yāā gbegbe wo yaha ye. Nanga nge na, n sē ke kai- bye cā tāŋ ye. Sukūhū gaa laam wo, n ga ba ke bye cā, mii Yāhā ra cā laha mii.

¹³ Loo na, katɛ- tāā kē ke ma, wākuayāā wee ke na ye. Koo kē ngĩ: Yesu wāta Yater kānkai- bye wo, tesē koho wātahayaha ne Yāhā na, tesē ntāŋ wādye wĩ ne. Koo kai- ngĩ wo, lii le cā ma yĩŋ, loo ne ntāŋ wādyen ne.

14

-Ye naa Yāhā Yrā tēn fānga wūhū koo ke!

¹ -Ye naa n ke nawee- ntāŋ poo n naa dye ye tāy! -Ye maha naa Yāhā Yrā tēn fānga wūhū koo ke! Lii tee cā ga maha naa n ke, loo ne nde: Ye

waha naa Yāhā kaplāŋ luhu ye laam wo, ye naa ke tōr nawee- ye.

² -Ye yāŋ, wii u waha yor raa ter syi pāā, tii nawee waa sē te cā ye, ufua sē ne ke pāā nawee-ye ye, u ne ke pāā Yāhā koo ya ye, koo kē. Yāhā Yrā Fānga kē ke ne ufua ta u n waha kai- nkāy pāā, nkāy syi ke wūhū nawee- na.

³ Wii u -sē Yāhā kaplāŋ luhu u laam wo, ma ke tōr nawee- ye, woo n pāā nawee- ne. U n ke pe naa n gaha yaha ye le Yesu kānde wāyār ne, pe maha pe ya plāhā pe kuee le laam wo, tesē pe maha naa laanyīn yāā.

⁴ Wii u -sē Yāhā wūhū pāā yor raa ter syi wo, woofua n ke u ka yaha ye u ya ya le Yesu kānde wāyār ne. Wii woo u -sē Yāhā kaplāŋ luhu u laam wo, ma ke tōr nawee- ye, u n ke Yesu kāndeyārfa yawāhāfa bye pe naa n gaha yaha ye le Yesu kānde wāyār ne.

⁵ Ye bye ma waha n pāā yor raa ter syi wo, le yō. Lii tē cā n ke loo ne nde: Ye waha naa Yāhā kaplāŋ luhu ye laam wo, ye naa ke tōr nawee-ye. Loo nde yō ke wāpāā na yor raa ter syi wo, tii waa sē te cā ye. Waa ma fihī pye, u too yor ter war, ma ke kaplāŋ yīntaha yar nawee- na, pe n naa n gaha yaha ye le Yesu kānde wāyār ne, n sē sye loo na ye.

⁶ Wo nna, loo nde na, n ga ye yey nde ne: N ma ba ka ye fla na, ma ga nii n pāā ye ne yor raa ter syi wo, tii ye sē te cā ye, le ga laa yō la ye kē? N ma -sē ba nii n pāā ye ne ye yor wo, ye ga naa ra kaplāŋ war. Loo na, n ga waha Yāhā wī laa syi yar ye na, laa na laantor wī laa, laa na Yāhā

kapān laa tē luhu ta laam wo, laa na kaklaha wīi laa. Koo ga waha laa yō ye kē.

⁷ Too fle wāwuu yāŋ, kornjon wāpēn ne, too rii te ma kapēn wān. Te wāpēn mii ma yee te sē n yi te ya wuhu na gbεgbε ye, waa saha ke yaa wār ye.

⁸ Wii u tūūtū syi wuu, ma nawee- yee naan wīi na, ke wāwuu mii ma yee ke sē n war ye, yoo ga waha cā u naa u ya gbihi te naan wīi na?

⁹ Koo syi, ye bya ye ma nii n pāā yor raa ter wo, tii waa sē te cā ye, ye kaplāŋ ga pye mii ke naa n war? Le ga nii mii wāgblenj ya dyanj tee n gble.

¹⁰ Yor ter nihi driyē wo, te bye -sē ma te yīntaha ne te ya wuhu na.

¹¹ Nawee waa ter ma n pāā ra ne, n ma yee n sē u yor ter kaplāŋ war ye, u ga naa ra yāŋ kulaafua; ta bya -sē ga naa u yāŋ kulaafua.

¹² Tee -sē Yāhā Yrā tēn fānga wūhū ke ye laam byε ne, fānga wūhū nkāy ke ga waha pe Yesu kāndeyārfa yawāhāfa ta pe n ka yaha ye, -ye naa koo ke!

¹³ Loo ne, wii u waha n pāā yor raa ter wo, u yai u Yāhā nar, ke n u ta u n maha waha naa ke kaplāŋ yīntaha yar nawee- na.

¹⁴ Ye sē yāā, ufua ma nii n pāā Yāhā ne yor raa ter wo, yor rii tuu sē te cā ye, u laam wo u cā u n pāā Yāhā ye, u sē -sē u ya yē kaplāŋ war ye.

¹⁵ U yai u lii pye? U ga naa n pāā Yāhā ye kaplāŋ nkāy ter syi ne, nkāy tuu sē waha ke war ye, -tuu maha naa n pāā Yāhā ye kaplāŋ nkāy ne, nkāy u koo war. U ga naa yay le Yāhā ye kaplāŋ

nkāy ne u sē ke war ye, -tuu maha naa yay le kaplāṅ nkāy ne u koo war.

¹⁶ Ye sē yāā, ma'a nii Yāhā sey ma laam ya wo, pe yawāhāfa saha ke kaplāṅ war ye. Pe -sē ga ba pye mii, pe le cā pe ma yē wāā sya pe yee, «Amēn, le nii ke syi»?

¹⁷ Taa Yāhā sey kaplāṅ nkāy ne, ke ma sya yō, ma nampyeṅ saha ke war ke n laa yō u kē ye.

¹⁸ Ndoo waha n pāā yor raa ter syi wo, ma ta ter ye bye yaha. N syaha wāā Yāhā kē loo nde wī na.

¹⁹ N ma -sē pye Yesu kāndeyārfa yawāhāfa nsoho wo, n ma pe klaha kate- bua ya ne pe yor wo, koo puar n naa kaplāmbuar pāā pe ye yor raa ter wo, tii waa sē te cā ye.

²⁰ Wo nna, ye ma syi ye naa kai- yāṅ mii kicar me ye ne ye. -Ye nii pēyār wāṅ syi dyaṅ kapee- wāpyeṅ kue ye, -tee -sē naa kai- yāṅ wāle yīntaha ne!

²¹ Ye sē yāā, le ma le yrūhū yaha Yāhā sabangbāṅ wo ma yee, Yāhā yee:
«N ga ba ta,

yor raa terfa n ta kaplāṅ pāā Yiisrefa ye.

N ga ba kulaafa yēr ta,

n naa n pāā pe Yiisrefa ne.

Loo naa bye ne,

pe saa ba naa ta kaplāṅ luhu ye.»

²² Loo ne, wāpāā yor raa ter syi wo, le ma kayar mpāy ye pe sē cīinde Yāhā cā ye, n sē yee Yesu kāndeyārfa poo ye. Waa Yāhā kaplāṅ wāluhu u ya laam wo, tesē ke wātōr ne nawee- ye, loo nde ma kayar pe Yesu kāndeyārfa poo ye, n sē yee mpāy pe sē cīinde Yāhā cā ye.

²³ Le ga waha pye ye Yesu kãndeyãrfa yawãhãfa bye pe ya wãã. Ye bye ma nii n pãã yor raa ter wo, tii waa sê te cã ye, naweete- mpãy pe pa pe sê cĩnde Yãhã cã ye, tesê mpãy ne pe pa kaplãŋ luhusaha wo, pe ga yee nafããn ne ye ne.

²⁴ Le ma -sê pye Yãhã kaplãŋ nkãy dye ye laam wo, ye n nii ke tõr yii wuhu na nawee- ye, koo puar. Loo na, mpãy pe pa pe sê cĩnde Yãhã cã ye, tesê mpãy ne pe pa kaplãŋ luhusaha wo, pe ma ye yẽ kaplãŋ war, loo ga ta pe n le cã laha pe yee pe kapee- wãpyen sê yõ ye. Ye kaplãŋ ga nii pe ye kasãhã dyan.

²⁵ Pe ga pe ya laam wũhũ bye yãã gbaa na. Pe ga kãnkũy gbãã kãntraha na, pe Yãhã sey, pe ye pye, a Yãhã ma ye ne cĩnde.

Ye yai ye naa n pye mii yawãhã wo

²⁶ Wo nna, tee yai ye naa n pye mii, le nde: Ye ma yii wãã yawãhã wo, laa na, ye laam wo waa ma Yãhã wãsey yaa gaa ne; waa -sê ma kaklaha wĩ laa ne; waa -sê ma Yãhã kapãn laa dye u laam wo, wãtõr wĩ; waa -sê ma u ga Yãhã wĩ laa pãã nawee- ye yor raa ter wo; waa ter -sê ma wii tuu ga waha too yor ter nde kaplãŋ wã klaha, nawee- bye n ke war. Pe Yesu kãndeyãrfa yawãhãfa ma koo kai- ngĩ bye luhu, ke yai ke waha pe ta pe n ka yaha ye le Yesu kãnde wo.

²⁷ Ye ma yee ye ga Yãhã wũhũ nkãy pãã pe yawãhãfa ye yor raa ter syi wo, ke pããfa ma n ter nawee- tãã yaha ye. Pe maha naa ke pãã pe ya wuhu na. Nawee waa ter yai u maha pye, wii

tuu ga waha ke kaplāŋ wā klaha, pe yawāhāfa bye n ke war.

²⁸ Le ma -sē pye koo kaplāŋ ngī wāklahafua wee ye, waa ma n yīmbui yir pe yawāhāfa n naa n luhu u ye ye. Wii ma nii kaplāŋ pāā yor raa ter syi wo, u naa ke pāā u ya ya Yāhā ye.

²⁹ Mpāy poo na pe Yāhā kapān laa luhu pe laam wo, poo syām syi, laa na tāā ya, ga waha kapān gbe, pe ke tōr nawee- ye. Pe yawāhāfa -sē ga yāŋ le pe kaplāŋ wo.

³⁰ Waa ma pye kapān na, loo yale wo Yāhā kapān laa ma dye waa ter laam wo, u n yee u ga le tōr, wii u ma kapān na, u yai u yaha le.

³¹ Loo nde na, Yāhā wūhū ma dye ye laam wo, ye ga waha naa ke tōr yii ye koo syi, yii wuhu na. Loo ga ta ye yawāhāfa ga kaklaha yāā, pe maha plāhā nii le Yesu kānde wo.

³² Mpāy pe koo Yāhā kaplāŋ luhu, ma ke tōr nawee- ye, pe yai pe pe ya wāyigi cā ke wāpāā yale ne.

³³ Ye sē yāā, Yāhā sē n traha nawee- pe nii wāplanpyefa ye. Ke n ke pe naa n nii yrīŋ na.

Mii le ma mii syi dyaŋ Yesu kāndeyārfa yawār wo, teebehe bye wo,

³⁴ ye ca yai pe yaha naa n le ye yawār wo, pe sē yai kaplāŋ wāpāā ne koo fla na ye. Ye sē yāā, Yāhā sabangbāŋ wo, le ma le yrūhū yaha ma yee, ca yai pe yīy kor naa n le.

³⁵ Pe ma yee pe ga laa yey, pe ga naa le yey pe pa ye kle wo. Le sē yō cōo u naa n pāā Yesu kāndeyārfa yawāhā wo ye.

³⁶ Tee n pye ke syi, yii fla la le Yāhā kapān yir

laa, yii ya la tee le yãã?

³⁷ Wii ma yee Yãhã kaplãŋ n dye woo laam wo, u n ke tǒr nawee- ye, laa na u ma le ga, a Yãhã Yrã Fãnga ma u ne, ufua yai u cã Yĩŋfua Yesu kãnde wũhũ kē tē yrũhũ n yar ye na.

³⁸ Wii ma loo sye, Yãhã bya ga ba ufua sye.

³⁹ Wo nna, lii le ma le na, -ye naa n ke Yãhã kaplãŋ n naa n dye ye laam wo, ye n naa ke tǒr nawee- ye! Ye ma syi ye sē Yãhã kaplãŋ wãpãã sye yor raa ter syi wo ye!

⁴⁰ -Ye naa ke kai- pye yĩntaha ne, ye ma n plan naa n pye ye!

15

Yesu Crise wãyir wĩ gbã wo

¹ Wo nna, le Yesu kapãyĩ lii tē pãã ye ye, ye le sya le yaha ye laam wo, ye yii plãhã le wo. N n traha n maha le gbihi pãã ye ye.

² Tē ba le yar ye na mii, ye ma le le yaha ye laam wo koo syi, le ga ta ye n sya yaha. Mii loo sē ne ye, le ga nii mii ye le ka sya ke dyaŋ.

³ Kai lii le ma yĩŋ, pe ra klaha le ne mii syi dyaŋ, ta bya, n ba ye klaha le ne koo syi dyaŋ. Loo ne nde: U Yãhã Yĩndefua Crise ku wo kapee-wĩ na, mii le bii cãã yrũhũ yaha Yãhã sabangbãŋ wo mii.

⁴ Pe u le gbĩ wo. Ke plii tãã wuhu, u n yir gbã wo, ma dur ba yrãŋ na gbaafa ye, mii le bii cãã yrũhũ yaha Yãhã sabangbãŋ wo mii.

⁵ U n u ya yar Pyar na. Loo kur ye, u n u ya yar pe kãnyãrwai sēnsye syãm na.

⁶ Loo kur ye, u n u ya yar u kãnyãrwai yĩsyãm gbeebua mpãy na. Pe fãnga ma nantãŋ yrãŋ na, nanem mpãy ya me pe ku pe laam wo.

⁷ Loo kur ye, u n u ya yar Syake na, ma ba u ya yar pe Yesu tẽnlehe bye na.

⁸ Poo mii bye kur ye, u n u ya yar ta bya na, ndoo wii n ma mii pe bye nambuange dyaŋ.

⁹ Ye sã yãã, ndoo kã n ma pe Yesu tẽnlehe bye nakũntãŋ. N sã yai ge yai pe naa ra yee Yesu tẽnlehe ye, n tee naa Yesu kãndeyãrfa ke wãboo ne.

¹⁰ Yãhã laantãr kãmay na, tẽ ma ngii n nii koo. Ke kayĩ lii pye ra kã, le laa yõ ra kã, ma sya ra ta ge ta ra n tẽn tẽ ma ta ter pe Yesu tẽnlehe bye yaha. Cĩnde -sã na, ndoo sã kã n waha yia loo tẽn nde na ye, te Yãhã laantãr roo fãnga kã, laantãr rii ke te wãã ra kã.

¹¹ Loo nde na, le tãy le pye ndoo woo, le tãy le pye poo woo, loo wĩ nen ya ne wo bye too n pãã ye ye Yesu Crise wĩ na, ye n u ta ye Yater.

Wo wãyir wĩ gbã wo

¹² Loo ne too n pãã nawee- ye ma yee, u Yãhã Yĩndefua Crise yir gbã wo, ma dur ba yrãŋ na gbaafa ye. Yii mpãy -sã maha pye mii ma le pãã, a mpãy pe ku wa, pe saa ba yir gbã wo, pe nii yrãŋ na ye?

¹³ Le ma pye cĩnde, le yĩntaha ne u Crise sã yir gbã wo, ma dur ba yrãŋ na ye.

¹⁴ Le ma -sã pye u Crise sã yir gbã wo, ma dur ba yrãŋ na gbaafa ye ye, too u wĩ pãã ye ye, wo ka n pye; tee u ta ye Yater, ye ka pye.

¹⁵ Tesẽ, le ga nii mii wo kawar fua taha Yãhã na, ma yee ke u Crise ta u n yir gbã wo, ma dur ba

yrãṅ na. Āwã, le ma pye cĩnde, Yãhã sê nakur ta te n yir gbã wo, ma n nii yrãṅ na ye, le yĩntaha ne, ke sê u Crise ta u n yir gbã wo, ma dur ba yrãṅ na gbaafa ye ye.

16 Ye sê yãã, le ma pye nakur saa ba yir gbã wo, te nii yrãṅ na ye, le yĩntaha ne, Yesu Crise sê yir gbã wo, ma dur ba yrãṅ na ye.

17 Le ma pye u Crise sê dur ba yrãṅ na ye, ye u ka ta ye Yater ke dyaṅ; kapee- nkãy tee pye, ke sê laha kãã ye na ye.

18 Tesê, Yesu kãndeyãrfa mpãy bye pe ku, pe saa sya yaha ye.

19 Wo ma koho taha yaha u Crise na, ma yee u koho le wo ye driyẽ nge ya wo, wo wĩ ga pee le ta ter nawee- bye wĩ na.

20 Lii le ma cĩnde, loo ne nde: U Yãhã Yĩndefua Crise woo kê u cãã yir gbã wo, ma dur ba yrãṅ na. Woo wĩ le yar, mpãy pe ku pe bya ga ba yir gbã wo, pe nii yrãṅ na.

21 Ye sê yãã, nawee waa wĩ bii ta, gbã n dye nawee- bye nsoho wo. Nawee waa ter wĩ kê le ta yagaa, nawee- bye ga ba yir gbã wo, pe dur nii yrãṅ na.

22 Dama wĩ le ta nawee- bye n nii n ku mii, mpãy bye pe -sê wãã le u Crise ne, poo bye ga ba yir gbã wo, pe nii yrãṅ na koo syi.

23 Le ga ba nii mma ma syi dyaṅ: Yesu Crise woo u cãã yir wa pe bye yaha. Kur ye, mpãy pe ma u wãm, poo ga ba yir pe ya ndoṅ gbã wo, pe nii yrãṅ na u durbaper.

24 Loo kur ye, driyẽ kuayale ne. U Crise ga ba yĩnfar ter bye kua kãã, tesê yahasee flẽ ne, tesê

fānga ter bye ne. Loo kur ye, u ga kai- bye le soho u Tuhufua Yāhā koho wo.

²⁵ Ye sē yāā, u Crise yai u nii kai- bye yīŋ na, Yāhā n sya ba u napī- bye yia, ke pe ta u n troho fyāhā tā pe na.

²⁶ Napī wii u ga pye klaha- kur ye, woo kē gbā ne.

²⁷ Ye sē yāā, le ma le yrūhū yaha Yāhā sabangbāŋ wo ma yee: «Yāhā ta u n troho fyāhā tā wān kur bye na.» Pe ma yee wān kur bye, pe sē -sē yee Yāhā bya ne ye. Koo kē ke wān kur bye yia, ma ta u Crise n troho fyāhā tā te na.

²⁸ Kai- bye fānga ma ba le soho u Crise koho wo, woo wii u ma Yāhā Dya, u ga u ya le soho Yāhā koho wo. Loo nde na, Yāhā ga nii ke kai- kur bye yīŋ na.

²⁹ Tee n yee, mpāy pe ku wa pe saa ba yir gbā wo, pe nii yrāŋ na ye, nwa ta ye laam wo, mpāy pe ya tāā n yi loho wo mpāy kē pe ku wa?

³⁰ Ndoo tesē ra tēntēwai ne, nwa ta kayīhī n wo yāā yalebye le Yesu kapāyī wāpāā wī na?

³¹ Wo nna, plii bye gbā ma ra tāy tūntūn. Ye wī ma ra ye yīnkuāyir wī, wo Yīŋfua Yesu Crise kāmāy na. Loo ne, n kai- ngī pāā ye ye.

³² Tē le sya, ma nii srā waygapyār ne Yefesyi wo, le ma ne pye naweete laam wī ya ne, le ga ba lii yō ra kē? Le ma pye mpāy pe ku wa, pe saa ba yir gbā wo, pe nii yrāŋ na ye, ah -too naa wo troho tāhā plāhā nge yor wo ke n yee:

«-Too naa n di, wo naa n wo;

ye sē yāā, sukūhū gaa laam wo waa ku.»

³³ -Ye yii yigi, ye sē plāhā nge yāā ke n yee: «Mboo wii ma pye naweeyō, ma -sē nii n taha

naweepee- na, pe ga ma le pe yor wo.»

³⁴ -Ye laantor yãã, loo le yõ, tee tyii kapee-wãpyeŋ na! Ye laam wo, mpãy ma pe sê Yãhã wũhũ cã ye. Le yai le naa fyar yigi ye kē!

Nakur kadye wãyir wĩ gbã wo

³⁵ Waa ga waha le yey u yee, a mpãy pe ku wa, pe ga ba pye mii pe yir gbã wo, pe nii yrãŋ na? Pe kadye ga ba nii mii syi dyaŋ?

³⁶ Naplege kē ufua ne. Ye sê yãã, ma'a ngaa pua le kãntraha wo, le pua yai le ku wa le cã fĩy.

³⁷ Ngaa pua ya ne taa le kãntraha wo. Le ga waha pye sepua syi, laa na ngaa ter pua. Ke digi wãŋ gii ke fĩy wa ma nii wan, koo sê kē taa le kãntraha wo ye.

³⁸ Pua woo pua woo, Yãhã ga u ta u n fĩy koo laam wãfĩy. Pua woo pua woo, u yai u fĩy u nii ngii, Yãhã ga u ta u n fĩy u nii koo kla.

³⁹ Yãhã ke wãn tii bye tãhã, tesê nawee ne, te bye kadye wee wãceŋ ye: Nawee kadye ma ke ya ya; treresyar kla kadye ma ke ya ya; kãnsyã kadye ma ke ya ya; fua kadye ma ke ya ya.

⁴⁰ Yãhãyĩŋ wãn bya ma, tesê kãntraha wãn ne. Yãhãyĩŋ wãn nayõr ma te ya ya, kãntraha wãn nayõr ma te ya ya.

⁴¹ Yai nayõr ter ma ke ya ya, yronŋ nayõr ter ma ke ya ya, yrompii nayõr ter ma ke ya ya. Pe yrompii bye ge, pe nayõr ma pe ya wuhu na.

⁴² Mpãy pe ku wa, pe ma ba yir gbã wo, ma nii yrãŋ na, le ga ba nii koo syi dyaŋ. Nakugu kadye ma le wa gbũ wo, ke ga fũhũ. Ke ma yir gbã wo, ma nii yrãŋ na, ke saa ku nantãŋ ye.

⁴³ Nakugu ma le kântraha wo, ke wee ngaa ye, fãnga wee ke na ye. Ufua ma ba yir gbã wo, ma nii yrãŋ na, u ga nayõr yãã, u maha nii fãnga ne.

⁴⁴ Nakugu ma le kântraha wo, ke ma kântraha kla ya dyaŋ. Ufua ma -sẽ ba yir gbã wo, ma nii yrãŋ na, u ga nii Yãhã Yrã kla. Yagaa, wo ma kântraha kadye ne, wo ga ba nii Yãhã Yrã kadye ne.

⁴⁵ Ye sã yãã, le ma le yrũhũ yaha Yãhã sabangbãŋ wo ma yee: «Dama wii u ma nawee cir, Yãhã kã ke bii ta u n nii yrãŋ.» Yesu Crise wii u ma mii Dama syãŋ wuhu waa dyaŋ, woo ma Yãhã Yrã lii le cĩnde yrã wãã nawee kã.

⁴⁶ Yãhã Yrã kla koo sã kã ke cãã n pai ye. Kântraha kla kã ke cãã n pai, Yãhã Yrã kla n cã taha.

⁴⁷ U Dama cir Yãhã bii u tãhã cuhu ne, u n nii kântraha kla. U Dama syãŋ wuhu woo ma yãhãyiŋ kla.

⁴⁸ Mpãy pe ma kântraha wãm, pe ma mii wii dyaŋ Yãhã bii u tãhã cuhu ne. Mpãy pe ma yãhãyiŋ wãm, poo wĩ ma mii wii dyaŋ u ma yãhãyiŋ wũũ.

⁴⁹ Yagaa, wo ma mii wii dyaŋ u pye kântraha kla. Wo ga ba nii mii wii dyaŋ u ma yãhãyiŋ kla.

⁵⁰ Wo nna, lii n n traha n pãã ye ye le nde: Wii u ma kântraha kla, kadye nã u ye ntãŋ ne, u saha dye Yãhã yai klo wo ye. Kântraha kadye ma gbã koho wo, kadye nge syi saha kuee yai tãŋ yrãŋ ye.

Gbã saa ba pye yãã nantãŋ ye

⁵¹ Yagaa, n ga kai laa pãã ye ye, lii tee sã cã ye. Wo bye saa ba ku tãŋ ye. Mpãy pe ku wa, tesẽ

mpây ne pe ga ba pye yrãn na, pe bye kadye ga ba wã klaha.

⁵² Le ga ba pye le yalebye wo, teele nen ya, yaliile wo tũtũũ ma ba yer wãwuu ne. Tũtũũ ma ba wuu, mpây pe ku ter wa, pe ga yir gbã wo, pe kuee yai tãn yrãn na. Wii mpây wo ma yrãn na, wo bye kadye ga ba wã klaha.

⁵³ Ye sê yãã, kadye nge gii ke ga waha fũhũ, ke yai ke ba nii ke saha fũhũ yãã ye; koo gii wākuyãã ma ke na, ke yai ke ba nii wākuyãã wee ke na ye.

⁵⁴ Kadye nge gii ke ga waha fũhũ, wākuyãã ma ke na. Sukũhũ gaa laam wo, ke ga ba nii ke saha fũhũ yãã ye, wākuyãã saa pye ke na ye. Loo yale wo, Yãhã sabangbãn kaplãn ngĩĩ ga nii cĩĩnde. Koo kaplãn kē ngĩĩ:

«Gbã wĩĩ kua, gbã yia tãn!»

⁵⁵ Gbã saha yia wãboo na nantãn ye.

Gbã fãnga kua.»

⁵⁶ Gbã fãnga yi kapee- wãpyeñ wo. Kapee-wãpyeñ fãnga -sē yi Yãhã kãnde katan wo.

⁵⁷ Yãhã kē ke fãnga wãã wo kē Yesu Crise kãmay na, wo n waha n yia. Ke miingbãn yai ke naa n sey yalebye!

⁵⁸ Loo nde na, wo nna, -ye yii plãhã, Yesu wĩĩ n nii gbãã ye laam wo, ye n u tēn tē naa n yõ. Ye le cã ma yee, le Yĩñfua Yesu tēn lii tee n tē woo gē kãmay na, tēwai sē ne ye.

16

-Ye naa koho le ye Yesu kãndeyãrwai ye!

¹ Pe war wāwāã wĩ na mpāy kē pe ma Yāhā nawee-, tē ba Galasyi Yesu kāndeyārfa yawāhāfa yar pe naa n pye mii, ye bya -ye naa n pye koo syi!

² Jimaasyi jimaasyi, nawee nawee woo, tuu ga waha yia kii na, u koo cēr yi ta yaha u ya tāy teelaa wo. Loo na, n ma ba pa ye fla na, ye saa naa yii fāy war wāwāã wĩ ne ye.

³ N ma ba ka ye fla na, ye ga naweeyōm mpāy yāŋ yi, ye pe war bye le soho poo koho wo. Ndoosē ga sabar yrūhū, n le soho pe koho wo. Ke syi, pe ma ga dye Yurusalem wo, ke fla Yesu kāndeyārfa ga pe wāpa yīŋ cā.

⁴ Ta bya ma -sē yai n ka Yurusalem wo, waa ke yrāhā yi wii na pe ne.

Kai- nkāy Pɔl n traha u pye

⁵ N ma ba ka Maseduan kāntraha na, n ga ta ter ga ye fla na. N n traha n ga yi Maseduan Yesu kāndeyārfa na.

⁶ Laa na n ga ba faa ma- ye fla na, laa na n ga ba wer cāã bye pye ye fla na. Loo na, teelaa fla wākaŋ ma ba yi ra na, ye ga waha koho le ra ye, ta n ka ke fla na.

⁷ Yagaa woo, n sē n traha wo n wii yāã wāyāã ya, ta n ta ter ye. N n traha n ba yalaa dye ye fla na, Yīŋfua Yesu ma le sya.

⁸ Pāānkōti gbar -sē ga ra yāã Yefesyi na nwo.

⁹ Ye sē yāã, ta yīŋ tāy tēngbāy laa ne nwo, koo kē. Napī- wānihi naa bye ne, n ga loo tēn nde tē.

10 Timuti ma pa ye fla na, -ye u yigi yõ! Ye sê yãã, woo bya ma le Yĩnfua Yesu tẽn na ta wãñ syi dyañ.

11 Ye ma syi ye ga naa u kloñ ye! -Ye koho le u ye u n waha u yrãhã yi yrĩñ ne, u pa ra fla na. Wo u sẽn, ndoo tesẽ pe Yesu kãndeyãrfa ne.

12 Wo tẽntẽwε Apolosu woo wĩ na, n naa u nar u ka ye fla na, pe Yesu kãndeyãrfa mpãy ne. Le sê -sẽ pye u laam wo yagaa ye. U ma ba draha yãã, u ga ba ka.

Kaplãñ kuasaha, syaha ne

13 Ye ma n faha yii na ye, -ye ta Yesu wĩ n nii gbãã fãnga ne ye laam wo! -Ye naa tetege le yii wo, -ye naa yii plãhã le Yesu kãnde wo!

14 Ye tyii ye ntãñ n dye yii tãy ye kãnkai- bye wo!

15 Wo nna, ye Tefanase cã u kahafa ne. Ye cã poo me pe cãã dye le Yesu kãnde wo Yakayi kãntraha na. Le tãy pe ye, pe n nii koho le pe Yesu kãndeyãrwai ye.

16 -Ye naa nagboho ta poosyifa na, tesẽ mpãy bye ne pe ma le Yĩnfua Yesu tẽn na!

17 Tefanase ye wãpa wĩ tãy ra ye, Fartinase ne, Yakakuse ne; tee sê pye ye, poo me pe pye ra ne ye draha wo.

18 Pe pa ma ba ra laam yĩn, le n maha ye bya laam yĩn ye kẽ. Ye yai poosyifa wĩ n naa n tãy ye ye!

19 Yasyi kãntraha Yesu kãndeyãrfa yawãrfa bye ye syar. Yakila u cõõ Persyile ne, ma suhu Yesu kãndeyãrfa mpãy ne pe pe ya wãã pe kaha wo, pe ye syar Yesu kãndeyãrfa syaha ne.

²⁰ Wo teende Yesu kãndeyãrfa bye ye syar. -Ye yii syar naambiyãr syaha ne!

²¹ Ndoo Pól, n ga kaplãñ ngĩ kuasaha yrũhũ nii ya: N ye syar.

²² Wii ma yee Yĩnfua Yesu wĩ sē n tãy u ye ye, yoosēn te pye ufua na. Maranata: Wo Yĩnfua Yesu, pa!

²³ Wo Yĩnfua Yesu, u u laantãr yar ye na.

²⁴ Ye bye ntãñ dye ra tãy. Wo bye wãã le Yesu Crise kãmay na.

YĀHĀ NAAMBIYĀRFĀN SABA
Karaboro, Eastern: YĀHĀ NAAMBIYĀRFĀN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 18 Apr 2025 from source
files dated 29 Jan 2022

15120496-00e2-503a-8d40-2d7cfdc1ba5b